




حياة بولست فيس بوكي





Status



Photo



Ask Question



Milestone

نوع العمل: ساخر

اسم العمل: بلا نيلة

اسم المؤلف: نور مانجا

الناشر: حروف منشورة للنشر الإلكتروني

الطبعة: الأولى أبريل ٢٠١٤

تصميم الغلاف: مروان محمد

تفضلوا بزيارة موقعنا حروف منشورة للنشر الإلكتروني على الرابط التالي:

<http://ebook-heruf.blogspot.com>

كما يمكنكم مراسلاتنا على الإيميل التالي:

Herufmansoura2011@gmail.com



Public ▼

Post



مقدمة لا بد منها

كنت ناوى أكتب المقدمة دى باللغة العربية و بعدين لاقيت أن سياق اللهجة العامية لا يحتمل أنى أبدأ مقدمتى باللغة العربية لأن ده حيعمل نوع من التناقض بين المقدمة و مضمون الكتاب... أنا بكتب المقدمة دى بصفتى واحد من متابعى الأستاذة نور مانجا مش بصفتى مؤسس حروف منشورة للنشر الإلكتروني.... أنا أصلاً من محبى بوستات هاشتاج #بلانيلة أساساً و عرضت فكرة جمع بوستات الهاشتاج ده فى كتاب للقارئ على الأستاذة نور مانجا و هى مشكورة وافقت على الاقتراح ده، ليه جمعته فى كتاب واحد.... مش عارف لأنى عايز القارئ يقول رأييه فى بوستات هاشتاج #بلانيلة، و أنا بجمع البوستات دى أكثر من حاجة حيرتنى لأن فيه بوستات تانية رائعة جداً بهاشتاجات تانية زى (صباح النعناع - جر شكل - ذكرياتش - ألخ) بقيت مش عارف أجمعهم كلهم و لا أكتفى بس بالهاشتاج بتاع #بلانيلة و بعد مداولات مع نفسى قررت أنى أجمع كل ما يندرج تحت #بلانيلة بس، و بعدين الحيرة التانية اللى وقعت فيها أن فيه بوستات بلانيلة كتير قوى طيب أجمعهم كلهم... مبقتش عارف و بعد مداولات تانية مع نفسى برضه قولت خلى معيار الجمع هنا هو ١٠٠ بوست تحت هاشتاج #بلانيلة، و كالعادة كان فيه مداولة تالثة و رابعة و لكن خلىنا فى المداولة التالثة و هو أنى أقوم بعملية تصحيح إملائي فيه ناس حتقولى ده عامية يعنى يتاخذ زى ما هو و أنا مش بقتنع بالفكرة دى لأن حتى لو كان البوست عامى لازم نهتم بالإملاء فيه و لما بدأت أنى أصلح الأخطاء الإملائية لاقيت أن بعض ما أظنه أخطاء إملائية متعمد و بعضها هو مطلوب أنه يكون على شكله الحال بالخطأ الإملائي الوارد فيه فتراجعت فوراً عن الفكرة دى، قوم إيه بقى





Status



Photo



Ask Question



Milestone

المدافلة الرابعة الى أخذت فيها مع نفسى كثير شوية, بعض الألفاظ الواردة فى بعض البوستات يظنها البعض خادشة للحياء العام (كلمة كبيرة قوى خادشة للحياء العام) و لكن برضه محاولة حذفها و استبدالها بألفاظ أخف حييوظ موضوع البوست لأن كل كلمة محطوبة فى مكانها بالمللى فبالتالى أى محاولة للحذف أو الاستبدال حتخل بموضوع البوست فقولت فى قرارة نفسى أنا حسيب البوست زى ما هو لو أنت من أصحاب الحس المرفه سيب الكتاب و توكل و لو أنت يعنى مش مأفور فعلا مش حتفوت الكتاب ده و لازم تقعد تقراه من الجلة للجلة... لأن بعض الألفاظ الى وردت فيه مش حتخربش ساعتك قوى يعنى ... باعتبارها فى إطار المقبول و المطلوب على حسب موضوع البوست و المناسبة الى اتكتبت فيه.

قوم يجرى بقى المدافلة الخامسة مع نفسى و دى بقى كانت ما بين الكتاب و ما بين انطباع القراء... يعنى إيه الفرق الى أنت قدرت أقدمه من كوني نقلت البوستات بتاعت الهاشتاج ده من الفيس بوك بتاع الأستاذة نور و ما بين الكتاب ... طيب ده الفيس بوك أجدع ... يعنى حعلق حعمل لايك حشير ... فردى بمنتهى البساطة يمكن عشان أجمع بوستات من نوع واحد فى كتاب واحد ... حتقولى مهو لو أنا ضغط على الهاشتاج ده حيجيلى البوستات الى من النوع ده كلها ورا بعض... حقولك متصدعنيش بقى ... أنا عاجبنى أجمعه فى كتاب واحد ... حل عنى يا عم!

طيب أخيراً تحب تقول إيه... أحب أقول للأستاذة نور شكرا أنك وافقتى على نشر الضحكة فى قلوب كثير من القراء الى الدنيا حوليهم و حواليا كلها كآبة صحيح هى بوستات ساخرة و لكنها من نوع الكوميديا السوداء الى بتكشف عوراتنا كمجتمع و كأفراد من الناحية الاجتماعية و السياسية و الأخلاقية و غيرها كثير...



Public



Post



Status



Photo



Ask Question



Milestone

الموضوع مش مجرد ابتسامة منك و ضحكة و لو أن ده مهم و غرض أساسى فى الكتاب و لكن فيه غرض تانى أنى بعتر البوستات دى بالذات مش ناقوس خطر لأنى مش بحب الكلمة دى و لكن بعترها دقة بالشكوش من أيد نور مانجا على دماغك و دماغى أن فيه مصيبة فى البلد... فيه مصيبة فينا... يا ترى أمتى حنفوق يمكن لما توصلك دقة الشكوش بضحكة تفوق و يمكن تتحسر و تكتفى بالحسرة و ممكن تتنهد بعد ما تقفل آخر صفحة فى الكتاب ... بس صدقنى حتكون طلعت بفكرة .. بعدة أفكار ... حتخليك ترجع تفكر من تانى و تسأل السؤال الخالد (هو إيه اللى بيحصل بالضبط!؟)

مروان محمد

مؤسس حروف منثورة للنشر الإلكتروني



Public



Post



Status



Photo



Ask Question



Milestone

٣ أبريل ٢٠١٥

زي مانتى من حقك تلبسى مايوه وسكىنى

هى من حقها تلبس حجاب ونقاب

زي مانت من حقك تسقط بنطلونك وتربى شعرك

هو من حقه يربى دقنه ويلبس جلبية قصيرة

احترموا حريات الناس يادعاة الحرية والتحضر

اللىحى والنقاب مظهر من مظاهر الإسلام

التريقة على المظهر قلة ادب



Public



Post



Status



Photo



Ask Question



Milestone

٣١ مارس ٢٠١٥

الشاب المصري المفتاح اللي بيطلب عروسة مفيهاش غلطة

بيفكرني بالمفلس اللي عاوز يقسط مرسيدس



Public ▼

Post

 Status Photo Ask Question Milestone

٣٠ مارس ٢٠١٥



هي لمبة ولا لنضة

هو شبشب ولا ششب

هو برطمان بطرمان

هي نهين ولا نهون

هي ليموناة ولا ليمونادة

هو برتقان ولا برتقال

هو بتنجان ولا برنجان

هي اوضة ولا اودة

هو دكان ولا محل

هي ليفة ولا لوفة

هي تسريحة ولا شيفونيرة

 Public ▼

Post



Status



Photo



Ask Question



Milestone

هي تراييزة ولا طراييزة

هي مناخير ولا مراخير

هي بنت ولا بت

هو موبايل ولا نوبايل

هي بنزينة ولا بنزيمة

هو جيش ولا ديش

هي حفرة ولا فحرة

هو بنطلون ولا منطلون

هي ماليكان ولا مانيكان

هي دي لغة ولا تلوث سمعي



Public ▼

Post

 Status Photo Ask Question Milestone

٢٨ مارس ٢٠١٥

نار تحت الرماد



في بعض الحالات الرجل المتجوز يقع في حب ست تانية غير مراته

في اللي بيتجوزها وده قادر

وفي اللي بيقضيها وده ملناش دعوة بيه

المشكلة بقي في اللي بيبقي لا قادر يواجه مراته ولا قادر يسبب حبيبته

ولما الظروف تحطه علي محك الإختيار بيعمل ندل مع حبيبته غصب عنه عشان

إعتبارات البيت والولاد وحجم خسائر هو مش قادر يواجهها

وهنا اصحابه واهله وحبيبته والعيشة واللي عايشينها بيتعاطفو معاه وعنده اوبشن

يفضض مع صاحبه ويتعصب علي مراته ويقلب حياتها جحيم وفي النهاية هو

الراجل الفارس النبيل اللي ضحي بحبه واتكسر ضبه

تيجي بقي نقلب الشراب لو اللي في الموقف ده ست

 Public ▼

Post



Status



Photo



Ask Question



Milestone

میں دول

یلا ملناش دعوة



Public



Post



Status



Photo



Ask Question



Milestone

٢٨ مارس ٢٠١٥

هو ليه كلمة يابن المرة شتيمة تطير فيها رقاب

وانت ابن راجل تعتبر تبجيل وإحترام

هو يعني الراجل خلفه لوحده ولا إيه



Public ▼

Post

 Status Photo Ask Question Milestone

٢٦ مارس ٢٠١٥


كونك تبعت اضافة وماله

تبعثلي رسايل عالآزر حب وشعر وماله

لكن يكون اسمك كده

كل-من-حاول-الوصول الى-مستواي ولم-يستطع-قال عني-مغرور

يبقي ابلغ عنك العباسية بضمير مرتاح

 Public ▼

Post



Status



Photo



Ask Question




Milestone

٢٦ مارس ٢٠١٥

عزيزتي الفتية المحجة اللي بتجيبى فستان سواريه اصلا عريان وتقعدي تلبسي تحته
كارينا وليجن وكلسون ورقبة ومعصم في محاولات مستميتة لتغطية اشياك اللي
بتبقي بطبيعة الحالة باظة من تحت ده كله

ضميرك مرتاح ???



Public ▼

Post

Status

Photo

Ask Question

Milestone

٢٦ مارس ٢٠١٥

هو التاريخ بيعيد نفسه ولا يستعبط وبيكرر نفس الشريط

#حرب_اليمن



Public ▼

Post

 Status Photo Ask Question Milestone

٢٥ مارس ٢٠١٥

شاهد صورة ابن مرآة خال النجم المشهور لن تصدق شكله

اللي بيكتب اخبار بالصيغة دي هيغرق محروق

 Public ▼

Post

 Status

 Photo

 Ask Question

 Milestone

٢٤ مارس ٢٠١٥

من سنتين

بعد تمشية طويلة مع صديقتي الروسية

قالتلي جملة مش قادرة انساها وكل ما افكرها افطس من الضحك

قالتلي انتو البنات عندكم حصلهم طفرة جينية ولا هجوم فضائي خلي مخهم بقي برة

الجمجمة لسة هندهش من كلامها لقيتها باصة علي اتنين محجبات من اللي بيركبو

شفشق في الطرحة من فوق


لسة هحاول اشرحها إن ده نوع من اللبس

قالتلي باللغة الفصحى اللي كانت بتدرسها

لابد انهم عباقة لديكم كل الحق في إخفاؤهم عن العالم

:D:D:D

لا حررتك إحنا خافينهم عن العالم عشان بنستعز منهم




 Public ▼

Post

 Status Photo Ask Question Milestone

٢٣ مارس ٢٠١٥

خلصتو هري في حوار عيد الأم
ابدؤ بقي في البيض يادوب تلحقو
قصدي بيض شم النسيم طبعاً



 Public ▼

Post



Status



Photo



Ask Question



Milestone

هاهاهاهاهاهاهاها

عشان دي وقورة اكر

الصبر يارب



Public ▼

Post



Status



Photo



Ask Question



Milestone

١٧ مارس ٢٠١٥

جاوب علي ام السؤال

عزيزي المنشكح من احوال البلد ومبسوط من خطوات سيادته الفضيعة نحو التقدم
وعندك شعور لا إرادي ان مصر صحيت معرفش إيه الي صحاها بس صحيت

كام سؤال وجاوبني بصراحة يا تخفي وبلاش مقاوحة

١شهادات استثمار القناة الجديدة كان ميعاد صرف ارباحها من ٣ شهور صرفت ؟

٢قطر وحشة وييدونا فلوس ويتدخلو في شؤنا يلعن ابوهم طب بالنسبة للإمارات
إيه النظام داخلين معنا جمعية بنفريين ولا إيه

٣ البلد دخلها ٤٦ مليار بالإحصائيات الحكومية من ساعة توليه الحكم عشرة منهم
دخلو مشاريع و١٢ دخلو خزانة الدولة ممكن تقولي الباقي فين

٤احنا نزلنا خلعنا مرسي بسبب ازمات الكهرباء والبنزين المشاكل دي اتحلت ولا
شعورك الوطني مغلوش عليها

هو قال بكرة تشوفو مصر بس مقالش بكرة الساعة كام



dreamstime.com



Public ▼

Post

 Status

 Photo

 Ask Question

 Milestone

١٦ مارس ٢٠١٥

إتفاجئت وانا واقفة في السوبر ماركت بإيد بتخبط علي كتفي

التفت لقيت واحدة شكلها غلبان قوي ومبهدة جدا متهياي عمرها ٥٠ سنة وبتقولي

إزيك يا مانجا وحشاني

-انتي تعرفيني

-ايه انتي نسيتي شكلي

-اسفة والله مش متذكرة

-انا شرين

-افندم ???

-شرين عزمي كنت معاي في ثانوي

-مش ممكن شرين إزاي انتي إيه جابك اسكندرية وفين الشياكة والرشاقة والألاطة

ردت بإنكسار- كل حاجة راحت


 Public ▼

Post



حببت اغير الموضوع

-اها قوليلي انتي هنا بتتفسيحي

-اتفسح إيه بس يامانجا انا نقلت هنا من حوالي ٨ سنين

-ومالك زعلانة ليه

-مش زعلانة إها ندمانة البيبي ده إبنك ؟

-اه دي بنتي تويا

-ماشاء الله ربنا يخلي

-وانتي فين ولادك

المرة دي دمعت

-ماليش ولاد

-ياحبيبتي معلىش كله رزق من ربنا

-اه الحمد لله

-ياستي لو نفسك في عيال خدي بنتي معاكي مجننة امي



 Status

 Photo

 Ask Question

 Milestone

-مانا ممكن اخلف بس مقدرش

-لا معلش مش فاهمة

-انتي عارفة انا اتجوزت مين

-لا اوعي تقولي اتجوزتي باهي

-اه اتجوزته

-طيب وده ماله ومال إنك متقدريش تخلفي هو باهي مبيخلفش

-لا عنده ولدين

-لا انا مش فاهمة حاجة خالص

يامانجا باهي كان إتقدملي بعد ثانوي وبابا رفض كذا مرة عشان سمعة عيلته

واخلاقه

-ها

-وانا ساعتها كنت بحبه جدا زي مانتو عارفين

-اه


 Public ▼

Post

-قالي نتجوز في السر ونحط اهلك قدام الأمر الواقع ساعتها هيوافقو

-ها

-إتجوزنا في السر واستنيت يشتغل ويكون نفسه

-ها

-اشتغل فعلا وكون نفسه فعلا بس إتجوز بنت خاله

-نعم ياختي وانتي إيه اللي سكتك

-كنت خايفة من رد فعل بابا والجوازة كانت شرعي وهو كان رافض يطلقني

وعشان ماليش عين اواجه اهلي طفشت وجيت قعدت هنا في اسكندرية كام مرة
ابقي حامل ويجبرني اجهض البيبي ولما خبيت عليه إني حامل ضربني لحد ما رحت
في غيبوبة

وهو متجوز وعایش وهنا هنا بموت كل يوم

-ياشرين انتي مش ضعيفة مش هتخسري اكر من كده ارفعي قضية وسيبيه

وارجعي لأهلك



Status



Photo



Ask Question



Milestone

-مقدرش ارجعلهم بعد ٨ سنين غياب دول لو شافوني مش هيعرفوني دنا اموت لو

بصيت في عيون بابا

-ويعني هو انتي كده عايشة

شرين كانت فاتنة شبرا

بقت إحدي ضحايا الحب

والبيه السنكوح اول ما نضف رماها جنب الحيط



Public ▼

Post



Status



Photo



Ask Question



Milestone


١٦ مارس ٢٠١٥

والمصحف والنعمة وربنا انا منخرة بالمؤتمر الإقتصادي اخر فخرنة

بس لو حد فيكم او في احفادكم شاف ثماره او اتعين في وظيفة من الفشخروميت

وظيفة اللي هيوفرهم مشاريع المؤتمر ابقى سلملي

علي..... ولا بلاش



Public ▼

Post



Status



Photo



Ask Question



Milestone

١٤ مارس ٢٠١٥

رسالة إلي سواقين التاكسي

التاكسي معمول عشان ينزلنا مكان محنا عاوزين مش مكان ماسيادته عاوز

التاكسي يعني اشاورله يقف اركب الأول وبعدين ا قوله انا رايحة فين

والمفرووووووووووووووو يوصلني من غير رغي كثير وبينني وبينه العداد

وشكرا مش لازم اسمع رأيه في تربتيت ام العيشة

ولما ا قوله وطي الكاسيت لالاالاالاالا لازم يوطيه حتي لو بيسمع قرآن مهو القرآن بيتسمع

بصوت هادي عادي يعني ومش لازم اسمع مصطفى كامل ندم عمري ومش لازم

يقولي تعالي اقعدي جنبي ومش لازم يقولي انسة ولا مدام ومش لازم يتكلم اصلا إلا

عشان يسأل عن الطريق وفلوسه وبس



Public



Post

Status

Photo

Ask Question

Milestone

١٤ مارس ٢٠١٥



زيارة المريض في كل حنة في العالم حمادة

وعندنا حمادة مات مفروس

عندنا الناس بتتعامل مع المريض بطريقة عجيبة شوية

يعني لو هو في المستشفى نلاقي اللي رايعين يزوروه رايعين يتفسحو اصلا يبقو
لابسين اللي عالحبل وواخين الأولاد الصغنين يلعبو في الجونية بتاعة المستشفى
ويطلعو تربتيت ام المرضي

ولو المريض غالي عليهم حبتين يبقو واخينله معاهم حلة محشي وفرخة محمرة
وشوية بامية مسبكة ولو لاقو ممنوع عنه الأكل ده يفرشو ويقعدو ياكلو جنبه
عشان يشلوه

وتلاقي بقي الرجالة حبايب قلبي اللي يعزم عليه بسيجارة والي يوجب معاه
بزغروف لزوم الروقان تقولشي عيان في جمصة

والمصيبة بقي لو المريض ده نايم في البيت

Public ▼

Post



Status



Photo



Ask Question



Milestone

ياختييييييي هتلاقي ام رجاء وام شيماء وثناء قاعدين جنب نافوخه وهات يا
حكايات عن فلان الي كان عنده نفس المرض ودلوقتي الحمد لله مات وفلانة بت
علانة قريبة ترتانة الي الدكتور اللهم احفظنا اداها حقنة غلط خلتها رجعت زلط
الحقيقة حكايات كلها امل وتفاؤل تخلي المريض صحته تبقي بمب

المصري معروف بجبروته وقوته ورخامة حضرته



Public



Post

 Status Photo Ask Question Milestone

١٠ مارس ٢٠١٥

جملة كتبها صديقي وليد في بوست فكرتني بقصة حصلت قدامي

عن شاب من اصدقائي مكانش بيبطل كلام عن الحرية واحترامه للبنات الجدعة وانه

شايف نواره نجم والي زيها هما احسن صورة ممكنة للبنات المصرية الصح

والبنات الي كانو معاه في الميدان كتف بكتف وإن لولاهم الثورة كانت باظت

وكلام كثير من النوعية

لحد ما جه في يوم قالي تعالي اعرفك علي عروستي

انا قولت بس بقي الواد ده تلاقيه متجوز زعيمة الثورة بت بقي ثورية متفتحة

ومن الآخر

ولما رحنا بيته اتفاجئت إنه متجوز بنت ريفية بسيطة مش فاهمة اي حاجة في الدنيا

ينطبق عليها مقولة - تكاد لا تفقه قولاً-

قولت يابت يا نور جايز حبها الحب مبينقيش

 Public ▼**Post**



Status



Photo



Ask Question



Milestone

وسألته يا محمد انت فاجئتني بمراتك كنت متوقعة إنك متجاوز واحدة من الميدان
مكنتش اعرف إن الحب هيجيبك علي ملي وشك وتتجاوز الجمال البسيط ده

-حب إيه ياست الكل انا منقيها كده قاصد

-نعم قاصد ؟؟؟ قاصد تجيب واحدة مبتفهمش حاجة وكمان مبتحبهاش

-مانا لو جبت واحدة فاهمة هتقعد تقرفني بقي نظام حقوقي وخرجني ومش
بعيد تقولي عايزة اشارك في فعاليات ونشاطات وانا مش ناقص صدام واروح بقي
اجيبها من القسم كل شوية

انا في إزبهلال- صدام ؟؟؟؟

-اه ياست الكل هو الواحد بيتجاوز عشان يريح دماغه اصلا

-امال إيه بقي الكلام الكبير الي كنت بتقوله والبنت بميت راجل والميدان ومعرفش
إيه مش كنت بتقول عليهم لما بيتمسكو في الأقسام حرائر

-البيت حاجة وبرة حاجة بس سيبك إنتي عجبتيني قوي في وقفة إمبارح

- انا لازم امشي عشان ثانية كمان واخليها وقفة حداد عليك



Public ▼

Post



Status



Photo



Ask Question



Milestone

١٠ مارس ٢٠١٥

والنبي مافيه حاجة حازة في نفسويتشي

غير إن البت توتا علي ما تكبر هيكون الكهريا انقرضت

احنا في الشتا والكهريا بتقطع ٣ ساعات

امال في الصيف هتعمل إيه يابرنس



Public



Post



Status



Photo



Ask Question



Milestone

٩ مارس ٢٠١٥

وتزامنا مع موضة اسماء البنات الي مش مفهومة ظهرت اسماء الكتب الي مش مفهومة برضه يعني تحس إن الكاتب حاطط إسم بنته (اشكيلوزومباز) علي الكتاب بتاعه

ومش بعيد يكون الكتاب ده كله مجرد شرح لإسم بنته

يتوب علينا ربنا



Public ▼

Post

 Status Photo Ask Question Milestone

٩ مارس ٢٠١٥

يا ابو الشريط الأحمر ياللي

الغنوة دي كنت بتتغني لطباط الشرطة زمان عشان كانو حلوين ومؤدين وولاد ناس



طب هو ليه محدش بقي يغنيهم دلوقتي

معرفش ليه

اكيد في تطوور جيني معين حصلهم لي الناس تبقي م طايقاهم وبدل ما تغنيهم
بتدعي عليهم اممممم

الغنوة دي كانت قبل ما علي ابن الجنائي يبقي ظابط يا إنجي

ليه بقي عشان علي كان طول عمره بيتعامل معاملة ابن الجنائي حتي لما جه يحب
والقلب له احكام حب انجي وانجي اميرة اممممم توصلها زاي يا علي نطلعها فوق
حاول ودخل كلية الشرطة وبرضه فضل ابن جنائي وفضلت هي اميرة

خلاص بقي يبقي مافيش حل غير اني اخليها هي كمان بنت الجنائي تعمل ايه يا
علي وتسوي ايه يا علي امممم انا اعمل ثورة كده وكده قوم ايه الروس تتساوي

 Public ▼

Post



Status



Photo



Ask Question



Milestone

والباشا ابو الأميرة يبقي زيه زي الريس عبد الواحد وبكده يطير من الفرحة لما اطلب
ايد انجي

علي واصحابه عملو ثورة طربقو البلد واعادو تخطيط نظامها الإجتماعي وخدو
الأرض من الباشا وادوها للجنايني عشان يبقي اغني منه وينول الرضا

لكن للأسف كل ده مخلاش انجي بنت جنايني ومخلاش علي يبقي امير

علي بقي حاقد وناقم علي المجتمع وقرر يطلع عين كل الناس عشان يفش غله بس
وهو بيعمل كده ملاقاش حد يمارس عليه عقده غير الناس الي من عينة ابوه الريس
عبد الواحد لأن من جواه كاره كونه ابن جنايني وعاوز يلغي الفكرة دي من الوجود

فضل يعمل كده ٦٠ سنة قهر وذل وتعذيب لكل ماهو جنايني جايز يشفي جرح
كرامته الي اتمسحت بحب انجي

لكن انجي محستش بيه الي حسو بيه كل ولاد الجنايني الي مقدروش يبقو ظباط
فقررو يثورو عليه وياخدو الكرباج من ايده ويطربقو القسم علي دماغه



Public ▼

Post



Status



Photo



Ask Question



Milestone

في المرة الأولى علي نجح عشان وهو بيعمل ثورته كان بيحلم بإنجي لابساله فستان
الفرح بس في المرة الثانية ولاد الجنائني فشلو عشان مكانوش بيذكرو في انجي ولا
تفرق معاهم لأنهم بيحبو سعاد وسعاد بتموت في الفوضى
حد فهم حاجة



Public ▼

Post



Status



Photo



Ask Question



Milestone

٨ مارس ٢٠١٥



وانا ليه اصلا ازعل من الناس

ال بتطلع اي كلام

واتقهر بقي واخش لنام

العيب عليا انا

كنت لازم استنصف

مش اي حاجة والسلام

والنبي يابت يا نونو شاعرة خطيرة XD



Public



Post

Status

Photo

Ask Question

Milestone

٧ مارس ٢٠١٥



_انا قررت اقفل الفيس شوية هتوحشوني

_انا قررت اتخلي عن الحجاب

_انا قررت انتحر

_انا قررت اهرش في قفايا

_انا قررت احذف الي مش هيتفاعل معايا وانا بهرش في قفايا

_الفستان لونه ايه

_سيلفي وانا بعمل بي بي

_سيلفي وانا مرتاحة بعد البيبي

المحن والإفورة لا دين لهم

مش كل حاجة في حياتكم تشاركونا فيها الرحمة حلوة والعقل احلي والي بتعملوه

ده وحلة

Public ▼

Post

 Status Photo Ask Question Milestone

٥ مارس ٢٠١٥

البت الحلوة الجذابة في نظر اي شاب

هي اللي معرفش يثبتها بكلمتين ولا عرف يقنعها ويسيطر عليها بشخصيته الفظيعة

 Public ▼

Post



Status



Photo



Ask Question



Milestone

١ مارس ٢٠١٥

كل ما افكر ان الناس الي زعلت علي الكلب الي اتقتل

نصهم كان بيغرق كلاب في التربة وهو صغير والنص الثاني كان يربط الكلب من
رقبته ويفضل يسحله جر وراه لحد ما يموت خنقا ابقي عاوزه اقولهم انت مش انت
وانت متعاطف



Public



Post

 Status Photo Ask Question Milestone

١ مارس ٢٠١٥

واكبر دليل علي تفاهتنا

إننا نسينا الناس الي ماتت والناس الي اتحرقت ونسينا ان مصر بتعتذر ونسينا ان
مصر بتحارب

ونسينا ان السجائر غليت وإن البني ادمين رخصت وبقي كل تركيزنا الفستان ازرق
ولا ابيض

 Public ▼

Post

 Status Photo Ask Question Milestone

٢٨ فبراير ٢٠١٥

الملحدین انواع

لما تقري بوست بتاع واحد تعبان في دماغه بيتناول فيه علي ربنا وعلي الأديان
بتقول في نفسك ده ملحد ربنا يهديه

الحقيقة هو ملحد فعلا بس ياتري من اي نوع متستغربش ماهو الملحدین انواع
في

الملحد المثقف : وده بقي قاري ومطلع وفضل يقري ويقارن في الأديان كلها عشان
يعرف يناقش وهيناقشك مناقشات طويلة عريضة يكشلفك فيها جهلك بالدين
وبعدين يستغل ده عشان يحط عليك وعي دينك اي كان وهو مبینقش غير حد هو
متأكد انه اجهل منه عشان يتنطط عليه بشوية الثقافة اللي عنده

وفي

الملحد بتاع الجمهور عاوز كده : وده بقي بيبقي ليه شوية معاتيه ماشيين وراه ولما
يبتدو ينفضوله يقوم عامل حركة الإلحاد دي عشان يفهم تابعيه انه مختلف اخر
حاجة وعنده اخر صيحة في الإلحاد

 Public ▼

Post

 Status

 Photo

 Ask Question

 Milestone

وفي

ملحد خدوني معاكو والنبي :ده بيبقي شخص مالوش اي تلاتين لازمة وفجأة
اتصاحب علي شلة عسلات كده ودمهم شربات وموهوبين في الإلحاد هو بيمشي
وراهم مش حبا في الإلحاد بس هو عاوز يفضل مع الشلة الجميلة دي وخايف
يعارضهم احسن ينطروه

وفي

ملحد علي ما تفرج :ده بيبقي حد فاضي ومش لاقى حاجة يعملها فيقعد يتأمل في
الوجود الإنشكاحي الزرومبيحي فيلاقي نفسه مش مقتنع ان راسه تبقي فوق
ورجليه تحت ويحط تساؤلات عميقة من نوعية هي الفرخة ولا البيضة ولا ديك ام
الفرخة

وفي

ملحد بتاع شوفتني وانا ملحد : وده بقي ليل نهار بوستات كأنه بيقول للناس تعالو
شوفوني بقي طب سلفي كده اوانا ملحد
الإلحاد ادب يا قلالات الأدب جاتكم الهم



Public ▼

Post

 Status Photo Ask Question Milestone

٢٦ فبراير ٢٠١٥

عرفت قصة كلب شارع الهرم وإتأثرت جدا عشان الكائن اللي لا حول له ولا قوة
بس مستغربة إن موت كلب يقلب بلد بتتعامل مع موت شبابها علي إنه بقي حاجة
عادية احنا مبيعديش اسبوع من غير ما نفقد عشرة علي الأقل من شبابنا
بس مشاعرنا المرهفة اكثر تأثرا بكلب شارع الهرب وقطط نادي الجزيرة من موت
البنّي ادمين

اه صحيح اصل احنا كتير وعاملين زحمة افما الكلاب وألقطط حاجة نادرة

 Public ▼

Post

Status

Photo

Ask Question

Milestone

٢٥ فبراير ٢٠١٥

التحرش بيحي من هنا

لما كنت في الشقة القديمة كنت بنزل اقضي طلباتي من مول العجمي هو اسمه مول

بس ع قده كده وشعبي حبتين بس الأمر لله ده اقرب سوبر ماركت

المهم في مرة وانا ماشية في المول ده سامعة اصوات جاية من ورايا بتقول كده

شايف الي ماشية دي روح اضربها علي روح متخافش مش هتعملك حاجة

وصوت ضحك

وروح ياواد متبقاش جبان

بصراحة مبصيتش وكملت مشي



دقيقتين وحسيت حد ضربني علي رجلي ببص لقيت طفل صغير ميكملش ٤ سنين

ومعاه امه وكائنات تانية مفروض انها امه وخالته مثلا وفطسانين من الضحك

بصراحة مفهمتش عادي يعني ده طفل وخبطني وجري

Public ▼

Post



Status



Photo



Ask Question



Milestone

بس وقفت شوية ارقب الموقف لقيت الأم الجميلة دي بتسلط إنها الصغنن يضرب
البنات علي بس عشان هو صغير مش طایل فيضربهم علي رجلهم ويجري
والأم منفشخة من الضحك قوي

طبعاً هو مش فاهم حاجة

مش هقولكم انا عملت فيها إيه بس مش ده موضوعنا

المصيبة إن الطفل ده دلوقت بيعمل كده عشان ماما تضحك وهو مش فاهم حاجة
وبكرة لما يكبر هيعمل كده عشان متعود ومتربي علي قلة الأدب ومهما عاقبناه مش
هيفهم إن دي جريمة

لأنه واخدها من امه جه نوع من الأمهات يستاهلو الحرق احياء

كنت اتمني يكون عندنا قانون يسمح اننا نسحب حضانة الطفل من الأمهات والأباء
الي اخلاقهم شاذة كده انا متأكدة إن ابن الست دي لما يبقي شاب هيتسجن في
قضية إغتصاب محترمة



Public ▼

Post



Status



Photo



Ask Question



Milestone

٢٤ فبراير ٢٠١٥

لما يبغي احمد عز في التلفزيون بيتكلم عن الربيع العربي بكل بجاحة
في حين ان واحد زي عبد الرحمن عاصم منتظر علي زمة قضية فيها اتهامات قتل
وتخريب وحوالي ١٤ قضية كلهم تلفيق
يبقي ليا حق احس بعدم انتماء واحباط



Public ▼

Post



Status



Photo



Ask Question



Milestone

٢٤ فبراير ٢٠١٥

بندهش جدا لما الاقي واحد من اخوانا الي فاكرين نفسهم متدينين

بيطلب منا نقاط بدع الكفار وجميع اعمالهم

ماهو يا حج الكمبيوتر والنت والفيس الي انت داخل منه عشان تقولنا نصايحك

الرشيدة من صنائع الكفار مقاطعتهمش انت ليه



Public ▼

Post



Status



Photo



Ask Question



Milestone

٢٤ فبراير ٢٠١٥



في جمهورية بلا نيلة

الدنيا عالخلق بخيلة

وولادها عايشين بالتيلة

عاشقينها ما بيدنا حيلة

نحلم نشوف منها جميلة

عملانا عمال ترحيلة

والعمر عدي في تغزيلة

نعرق ونتعب في الزرعة

والمرتاحين ياخذو الشيلة



Public



Post



Status



Photo



Ask Question



Milestone

٢٢ فبراير ٢٠١٥

الراجل الي اخترع الكعب العالي هو والي اخترع الكرافة
ليهم مكان مخصوص في الجحيم جنب اخوهم الي اخترع البنطلون الفيزون المشجر



Public ▼

Post



Status



Photo



Ask Question



Milestone

١٩ فبراير ٢٠١٥

مممم احم احم تست تست تست

في بعض الأصدقاء عالفيس بوك بصراحة مش بثق فيهم وتقريبا كده بينزلو من

نظري يمكن انا الي غلط وهما صح بس ده رأيي ومش هغيره

-الصديق الي تتكلم معاه إن بوكس وياخد كلامك سكرين شوت ده

غير محل ثقة إطلاقا مهما كانت اسبابه

الصديق الي بيبقي ضايفني لمجرد إني بنت تاء مربوطة في قائمة السيادة

الصديق المتطفل الي بيبقي شايفك فاتح ويبعتلك رسالتين ثلاثة طب يا اخي

مردتيش بيبقي مش لازم هبروميت رسالة ما لو كنت هرد كنت رديت من الأول

الصديقة الي بتعمل تاج في صورة ملهاش لازمة انا ذنبي ايه اشوف توتي وهي

بتسلم علي شوشو ومنة وهي بتقلش عليهم



Public ▼

Post



Status



Photo



Ask Question



Milestone

وفي نوع بقي اسؤ من كل دول بيبقي صديق عندي وفي نفس الوقت كاتب جديد
صغنن يعني قوم إيه يعتبر الصفحة بتاعتي لوحة الإعلانات بتاعة حضرتته ولما اقوله
خف علينا يقولي بكل سماجة اصل صفحتي مش متشافة إنما صفحتك زحمة وانا
عايز اسوق لنفسي نعم حضرتك وانا ذنبي إيه
ارحموني يرحمكم الله والنعمة كده عيب



Public



Post



Status



Photo



Ask Question




Milestone

١٩ فبراير ٢٠١٥

في طايقة في الهند بيعملو عادة وحشية شوية

العادة دي هي ان الست الي جوزها بيموت يبحرقوها معاها



مممم عادة وحشية مش كده

كفرة الهنود اصلا ولود تيت مش كده

طب ايه رأيك اننا بنعمل حاجة اوسخ من كده بكتير

علي الأقل الهنود بيموتوها فبترتاح من عذاب الدنيا انما احنا الست الي جوزها

بيموت او بيطلقها بنتفنن في تطليع تيت ابو الي خلفوها

هحكيكم قصة لا مش قصة دول تلت قصص بس بنهاية واحدة مع اختلاف الظروف

بس النهاية دايما واحدة

عن ٣ ستات اتنين جوزهم اتوفي وكل واحدة فيهم معاها بنت ووحدة جوزها طلقها

وكان عندها طفلين



Public ▼

Post



الأثنين الي ازواجهم اتوفو

سماح : سنها كان ١٨ لما اتجوزت جوزها اتوفي في حادث وهي سنها ٢٠ وسايب

معاها طفلة صغيرة

سماح قررت متتجوزش وتعيش عشان بنتها وخرجت تشتغل عشان تصرف عليها

وماشين جنب الحيط

الأهل والجيران والعالم مرحموهاش وكلام من نوعية

_اتجوزي انتي صغيرة خسارة شبابك

_انتي مش عاوزه تتجوزي عشان تدوري علي حل شعرك

_لازم راجل يابنتي يحميكي ويحمي بنتك

وقعدو يضيقو عليها لحد ما اتضرت تتجوز في الآخر

والنتيجة كانت كده

_معاشها هي وبنتها اتسخط بقي الربع (اضطهاد قانوني)

_الناس الي كانت بتساعد اليتيمة بطلو (عقاب ليها عشان اتجوزت)



_الناس الي ضغطو عليها عشان تتجوز هما نفسهم الي بقو يتغمزو ويقولو
مقدرتش تصبر علي روحها وجابت لبننتها جوز ام

هالة

جوزها اتوفي وسايب معاها ولد سنه ٣ سنين وهي سنها ٢٥
هي جميلة وشابة ومن حقها تتجوز بس خايقة من كلام الناس وخايقة عامعاش
وخايقة من اهل جوزها ياخدو حضانة الولد وفي نفس الوقت خايقة علي نفسها من
الفتنة هي بشر برضه فهداها تفكيرها انها تتجوز عرفي وكانت النتيجة
ان الزوج الراجل قوي مرمطها ومسح بيها ابلاط علي اعتبار ان الجوازة في السر ومش
هتقدر تفتح بؤقها

سامية

دي بقي اتجوزت وهي سنها ١٧ سنة وخلفت طفلين ولما لقت الزوج انسان غير
سوي طلبت الطلاق رفض فرفعت خلع واخذت حضانة العيال بس عشان هي صغيرة
وفي بلد ارياف اضطرت تتجوز ثاني قوم ايبسييه الزوج الي هو اصلا غير سوي يرفع
قضية حضانة والقاضي يحكمه عشان الزوجة اتجوزت يعني خد العيال من حضن

 Status Photo Ask Question Milestone

امهم واداهم لراجل مريض نفسيا علي اعتبار ان القانون ابن الكلب يقول ان الست
الي تتجوز تتحرم من عيالها

الزوج المختل ده اخد العيال وحرمها حتي تشوفهم لأكثر من ٧ سنين وهي بتعرف
اخبارهم بالسمع من الناس وعرفت ان العيال في حالة زفت وعليهم اثار تعذيب
فرفعت قضية حضانة تاني وبرضه اتحكم للزوج علي اعتبار انه افضل للعيال من زوج
الأم

طيب يعني يا حضرة القانون كنت هتبقي مبسوط لو الأم متجوزتش ومشيت في
الحرام في السر عشان تحتفظ بولادها

يبقي مش لازم نلوم علي الي بتنتحر والي بتقول انا عايشة بشرفي عشان احنا مش
مدينهم اختيارات تانية

قانون عقيم في مجتمع مريض

القصص الثلاثة حقيقية

 Public ▼

Post



Status



Photo



Ask Question



Milestone

١٨ فبراير ٢٠١٥

في امهات كثير لو كانو يعرفو انهم هيتعبو ويخلفو ويسهرو ويربو ويكبرو عشان في
الأخر ولادهم يخلونا نشتمهم بالأم كانو وفرو تعبهم

عن ولاد المفكوة

ماهي لو مش مفكوة مكانتش جابتهم



Public ▼

Post



Status



Photo



Ask Question



Milestone

١٦ فبراير ٢٠١٥

معلش سؤال رفيع

الضربة المصرية لما يسمي بأماكن داعش في ليبيا قامت بموافقة وبالتعاون مع كيان

ليبيا المتمثل في حفتر

يبقي لما تيجي قناة الجزيرة تذيع ان الجيش المصري ضرب مدنيين هناك وانت مش

بس تصدق لا وكمان تشير الصورة مع حبة كلام تخين من نوعية مدنيين ابرياء

يبقي انت محتاج تركز شوية مع نفسك كده

متسلمش عقلك للجزيرة

ولو فرضا ان الي ماتو في الضربة مدنيين ابرياء والله الي اتدبحو إمبراح مكانوش

علب كشري

قناة الجزيرة وهرها منتهي اللامعقوليزم



Public ▼

Post

Status

Photo

Ask Question

Milestone

١٢ فبراير ٢٠١٥

اعزائي السناجل والسنجولات

مصاء الخير

عاوزة اكلمكم في موضوع كدهون بمناسبة يعني ان المحروس الظلانتين عالابواب

احب اقولكم ان محدش عاجبه حاله وزى مانتو بتحسدونا ككابلز مانتمين احنا كمان

بنحقد عليكم كسناجل مانتخين

علي الحلال انتو ما حاسين بالنعمة الي انتو فيها

بص يا عزيزي الشاب

طول مانت سنجل انت برنس وملك اللحظة وحياتك بتاعتك انما لو دخل فيها اي تاء

مربوطة يبقي عليه العوض

انت لو مرتبط بالحب

يبقي هتقضيها تليفونات ودباديب وانت مبقيتش تحبني زي الأول وعماد ابن

خالتشي جاي يتقدملي والجو الرخيص ده



Public ▼

Post



ولو انت خاطب يبقي هتقضيها هدية عيد ام وهدية عيد شرطة ومناسبات
وواجبات لحد ماتبقي شحات
وياعيني بقي لو انت متجوز هتلاقي الجان الي كنت بتشوفه في المراية اتحول بقدرة
قادر لحنفي او شكري او علي افضل تقدير عبد القوي شعرك الحلو الي كان الجيل
بيخله واقف علي حيله ذهب مع الريح
رشاقتك وباسيبساتك راحت في الكازوزة وطلعلك بدالهم بالونة والهانم تقعد تتريق
عليها ليل نهار
ولو انت اب يبقي انسي نفسك خالص وعيش عشان المفاعيص الصغنين ومرتبك
هيروح عالبامبرز والي بيكح والي عاوز درس ماث
اما انتي ياعزيزتي الفتاة فحدث ولا حرج
بمجرد ما تنشكي في قلبك وتشاوري علي فارس الأحلام
وانتو مرتبطين هتقضيها تليفونات وامسحي صحابك عالفيس وانا مستهلكيش
واتجوزي عماد ابن خالتك احسن وبلا بلا بلا



ولو اتخطبتي يبقي استحملي زيارات خالتك ام فارس الأحلام واقطعي علاقتك
بصحابتك وإيه الي انتي لابساه ده انتي فاكرة نفسك مخطوبة لسوسن ولا إيه
ولو جت الطوبة في المعطوبة واتجوزتي يبقي عليه العوض فيكي وفي شخصيتك

الغزال الرشيق هيبقي بطريق

شعرك الي كان رايح جاي عالكوافير هيتربط ربطة بهانة العمشة

ومصيبة سودا لو بقيتي ام

شياكتك تنسيها عشان النونو هيجي علي احلي طقم عندك ويقشط عليه وصحتك

استعوضي ربنا فيها من كنس لمسح لطبخ وكل ده كوم وكائن السلبندر الي

هتصطحبي بيه كل يوم كوم تاني

اعزائي السناجل اسمعو حسين الجسمي محدش مرتاح

والنعمة انتو في نعمة

قالك فلانتين



Status



Photo



Ask Question



Milestone

١١ فبراير ٢٠١٥

بعد ما عرفت ان اللغة الروسية هتضاف علي مناهج التعليم المصرية

تخيلت نفسي بعد كام سنة بقول ل #تويا

وهي نازلة عالحضانة

اوعي متخلصيش سندوتشات الخراااشو

قالك تعليم روسي

ده العيال مبتعرفش تكتب عربي ولا انجليزي



Public ▼

Post

Status

Photo

Ask Question

Milestone

١٠ فبراير ٢٠١٥

التفتيش الأمني في كل حنة في العالم حمادة وعندنا حمادة مات من الضحك
 انا بصراحة لما باجي ادخل مول ولا مكان في بوابة إلكترونية ببقى ماسكة نفسي من
 الضحك بالعافية وبينني وبينكم مبقدرش امسك نفسي من ممارسة قليل من الغتاة
 علي الناس اللي بيفتشو

يعني مثلا وانت داخل مول او مستشفى او سينما هتلاقي الأتي

بوابة إلكترونية

هي صحيح إلكترونية بس واضح إنها لقطت شوية غباء من قعدتها معانا عشان يا
 بتصرف عمال علي بطل يا خرسة مبتنطقش اساسا

وورا البوابة دي فرد امن حاجة كده دبلون شيجارة تشطيب سوبر لوكس عالمفتاح
 والشهادة لله بيبقو جايين ست عشان تفتش شنط الستات

فرد الأمن دهون بقي بيبقي فاهم الزيتونة الأمنية يروح باصلك كده
 من فوق تحت لفوق ويشاورلك بإيد الكريمة بمعني عدي



Public ▼

Post



والست الي بتفتش الشنط تروح حاطة ودنها عالشنطة وتهزها بصراحة كم تمنيت
ان القونبلة تنفجر في إحدي المرات وهي بتهز الشنطة عشان تحرم تهزها بالطريقة
الهبله دي تاني

وياسلام بقي ياسيدي لما تكون داخل بعريبتك نظام بقي افتح الكابوت واقفله ويلف
لفة هو وسعادة البيه الكلب البوليسي حوالين العربية قال يعني قفش التيته
هي الناس دي مبتتفرجش علي افلام عربي مشافوش الست نادية الجوندي في فيلم
خالتشي بتسلم عليكم لما كانت حاطة القونبلة لامؤاخذه في احم احم قصدي يعني
كانت مخياها كويس

طب بلاش نادية مشفتوش فيلم ترمينيتور لما كانو حاطين القنبلة في شاسية العربية
يلا ماعلينا المهم اننا امنيا بنظبط ونسيطر وبنفذ التعليمات الي عفا عليها الزمن
وسمعني سلام خلي السلاح صاحي

يا تأمن عدل يا تخبي خيبتك ببشكير وتتوكس



 Status Photo Ask Question Milestone

٣١ يناير ٢٠١٥

لو إنت فرحان بموت افراد الجيش عشان تثبت إن السيسي علي خطأ تبقي حلوف

ولو إنت شايف إن الي عمل كده إخوان تبقي اهلل

عشان الإخوان لو بالقوة دي والذكاء ده والسلاح ده مكنوش اتدبحو زي الفراخ في

رابعة

ولو انت بتترغي في اي حاجة عشان تبقي محلل سياسي الله يباركك اتلهي واقري

الفاحة للشهداء عشان لما يجي الدور علينا نلاقي الي يقرالنا الفاتحة

 Public ▼

Post

Status

Photo

Ask Question

Milestone

٢٧ يناير ٢٠١٥



قناع توت عنخ امون والي حصله

زعل ناس كثير وخلي ناس كثير إتفاجئت

بس انا لأ عشان متعودة علي كده

هحكيلكم عن حاجة

جدتي الله يرحمها كانت من اسيوط وكان جنب قريتها علطول قرية اسمها مير قرية
مير الفرعونية

وكانت جدتي وكل الي من سنها والي قبلهم ليهم مثل عجيب شوية

#الفقري فقري حتي إن سكن في مير وإن زرعة ياكلها الطير#

المثل معناه إن الإنسان النحس نحس حتي لو سكن في مير

قرية مير كانت معروفة زمان ولحد دلوقت انها ارض الذهب

اكثر مكان في العالم فيه اثار فرعونية معموله من الذهب الخالص

Public ▼

Post

وكان اهلها علي مر الزمن يكتشفو الكنوز دي ويبيعوها للمحتلين والهواة واي حد
وكانو طبعا بيغتنو جدا ما هم ساكنين في مير بقي ومعظم تجارتهم في الآثار كانت
بتتم بمساعدة موظفين وخبرا في وزارة الآثار نظرا لقدرتهم الفريدة في تامين الكنوز
دي

وفضلت الحكاية دي ماشية فيهم من جيل لجيل
لحد من فترة كده لما الحكومة بدأت تأخذ بالها شوية بدأت تضيق عليهم في تجارة
الآثار

حصل إن شخص عثر علي تمثال من الذهب الخالص وزنه حوالي ٦٠ كيلو جرام
حاولو يخرجوه بره ما امكنش
حاولو يجيبوله مشتري لحد هنا

اللعبة اتكشفت وكانو هيتقفشو عشان مرضيوش ينصو مع ظابط فاسد
قوم الخبر الي بيساعدهم عشان كان مستعجل علي نصيبه في التمثال
اقترح علي شركائه انهم يسيحوه ويبيعوه ذهب عادي



Status



Photo



Ask Question



Milestone

وحصل للأسف انهم حطو التمثال في واحد من افران الطوب وسيحوه

وده العادي

لما تركة كبيرة تقع في ايد ناس ميستهلوهاش علي شوية ضماير خربانة



Public ▼

Post



Status



Photo



Ask Question



Milestone

٢٧ يناير ٢٠١٥



هستني ايه من شعب عايش في غيبوبة

يلهيه رغيّف وتدوخه انبوبة

كل تفكيره في نانسي وزوبة

وهيفا اطلقت ولا حامل ولا مخطوبة

دي ناس شالت عقولها حطت مكانها طوبة



Public ▼

Post



Status



Photo



Ask Question



Milestone

٢٦ يناير ٢٠١٥



في نوعية من الكائنات عايشين معانا علي نفس الكوكب الفيس بوكي

والنوعية منها ذكور من نوعية

مخاوي الليل

الواد الجامد

وإلي اخره من الأسماء العجيبة

وده كائن في منه مسالم بيتغذي علي البلوك ويحلي بالشتيمة ويبقي منشكح اخر

حاجة

ونشاطه عبارة عن شقط بنات من البوستس بتاعة صحابه تلاقيه راح مبرشط في

البوست واي تاء مربوطة وارشق يا معلم البنت تبقي كاتبة واو جميل وده يقولها

روعة كومنتك بتدل علي رقة إحساسك إلهي تنشك في إحساسك يابعيد

وفي منهم النوع الشرس وده بقي من اكل لحوم البشر تلاقيه بعثلك صور قبيحة

بدون سابق معرفة ويهكرك ويشتم صحابك او ينزل صور سافلة عالوول بتاعك تقولي

هيستفاد إيه اقول بيرتاح لما الناس تدعي عليه



Public ▼

Post

 Status

 Photo

 Ask Question

 Milestone

الأنثي الفيس بوكية من الكائن ده ترفع صورتها وهي واخدة وضع البوس

وتلاقي الكومنتات من نوعية

ابو عمر ؛ ماشاء الله قمر

ابو نواف ؛ فديت هالعيون والله وحاطط صورة بوكية ورد

توتي وفوتي وميمو وميوش ؛ واو طول عمرك موزة يوغتي عاتي بوسة

اموووووووووووااه وهما اصلا مش طايقينها

ابو فهد؛ ياقومر ارجو قبول الأضافة

فارس الأحلام ابو تفة ؛ واو كيوت اخر حاجة

والسؤال هنا

صحيح من حقل تنزلي صورك بس هل انتي راضية عن نفسك وانتي شايفة كومنتس

من النوعية دي

انتو مين ومين الي بيمولكم وهل ليكم مييدات او بودرة نرشها ولا ايه النظام



 Public ▼

Post



Status



Photo



Ask Question




Milestone

٢٤ يناير ٢٠١٥

الحب من طرف واحد

عامل زي واحد محضر مج نسكافيه في ايده ومستني المية تغلي وهو حاطط فيشة
الخلاط

مهما استني مش هيشرب حاجة



Public ▼

Post

 Status

 Photo

 Ask Question

 Milestone

٢٣ يناير ٢٠١٥

الهانم في السوبر ماركت

استحملو بقي شوية بوستات من السوبر ماركت لحد ما اقدر اخرج تاني

وانا داخله السوبر ماركت من يومين داخل جنبي راجل بيجر التول بتاعة السوبر

ماركت وجنبه ماشية المدام زي الفل

اول ممر بتاع الألبان الست بتختار الحاجات وترمي في التول والراجل ماشي جنبها

ساكت

انا مضطرة امشي وراهم عشان ماشيين جنب بعض بالعرض والنظام في فتح الله

النخيل مينفعش امشي من حته تانية هما عاملينه بطريقة غبية شوية معلش

المهم جينا عند المكرونة

والراجل ياعين امه مد ايده واختار كيس مكرونة

تقوم الهانم المحترمة مراته


 Public ▼

Post



Status



Photo



Ask Question



Milestone

جوزك احترامه من احترامك لنفسك ا

رسالة للبيه شرابة الخرج

انك تكون شخصية مسالمة مش عيب العيب انك تمحي كرامتك قدام اي حد مهما

كان

الجنس الناعم ناعم والجنس الخشن خشن



Public ▼

Post



Status



Photo



Ask Question



Milestone

٢١ يناير ٢٠١٥

نوع من انواع البجاجة الصيرف

ان حد يسرق بوست من حد ولما تقوله إيه ده يقولك إيه عادي توارد افكار

استقيموا يرحمكم الله وبلاش مقاوحة في الغلط



Public ▼

Post

 Status Photo Ask Question Milestone

١٧ يناير ٢٠١٥

يقولك بتعرف الأخوات منين

قاله اخويا اللي يزعلني يزعله اللي يجي عليا يجي عليه

الي يجرحني يجرحه

انا عنده اهم من اي حد

قاله طب وغير كده

لا غير كده راجع نفسك وإتأكد إنه اخوك اصلا

 Public ▼

Post

 Status Photo Ask Question Milestone

٨ يناير ٢٠١٥



يعني افتح رسايل الفون

الاقى دي

لو عايز تحمل اغاني نصره رسول الله ابعت للرقم ده

لو عايز كول تونك غنوة لنصره المصطفى اضبط كذا

حقيقي الشركات دي متفرقش كثير عن الدود الي بيتغذي علي الجثث

حتي إهانة الرسل بتتاجرو بيها ياولاد السافلة

هو الرسول مبدئيا مش محتاج اغاني لنصرته ياشوية حيوانات

وإزاي اصلا غنوة تافهة مغنيها مطرب جاهل ما يعرفش اي حاجة عن الإسلام غير إن

امه زلطته مسلم والمنتج قاله غني فنتع الغنوة الفشيخة دي

انا ساعات بحس أن الشركات دي بتفرح بأي احداث شغب او رسوم مسيئة للدين

عشان تقرفنا بالإعلانات الزفت دي

 Public ▼

Post

 Status Photo Ask Question Milestone

هتتنصروه إزاي بمطرب مفتول العضلات بيقوق وهو بيغني
ولا بمطربة اخر معلوماتها عن النصر انتصارها علي السيلكون

اتقو الله وارحمونا

انا من كتر القرف كنت هرمي الفون في الزبالة
نفسى الشركات دي تنصف بقي وكفاية متاجرة

 Public ▼

Post

 Status Photo Ask Question Milestone

٧ مارس ٢٠١٥

يعني عاصفة هدي الأردنية وزينة البنانية يعملو فينا كده

طول عمرنا الحريم جايانا ورا

عارفين و كانت اعاصفة اسمها محسن مثلا ولا مختار مكناش اتمرمطنا كده

 Public ▼

Post



Status



Photo



Ask Question



Milestone

٥ يناير ٢٠١٥



احنا كل حاجة عندنا اوفر

برد اوفر

حر اوفر

تأييد اوفر

معارضة اوفر

جهل اوفر

كل حاجة اوفر ماعدا الشغل

يا عالم يا اوفر



Public ▼

Post

 Status

 Photo

 Ask Question

 Milestone

٣٠ ديسمبر ٢٠١٤

خطفت ساعة نوم كده من ورا مدموزيل تويا بس برضه لازم تحصل حاجة تصحيني
وتقل مزاجي عارفين صحيت علي ايه

صحيت علي صوت خناقة بين جارنا ومراته

والله العمارة متصممة شيك بحيث منسمعش بعض بس الأخ المحترم كان صوته اعلي
من المسافات والحيطان

عادي ان كل زوجين يتخانقو ووارد ان صوتهم يعلي حسب تربيتهم واخلاقهم لكن
الي مش عادي

ان الراجل المحترم اثناء الخناقة يذيع ادق اسرار مراته الأسرار الي توجعها وتعري
ضهرها

البيه الذكر بيقولها: ماهو لو كنت اعرفك اب ارد عليه كنت رديت

لو ليكي راجل مكنش ده يبقي حالك


 Public ▼

Post



Status



Photo



Ask Question



Milestone

وهي ترد بإنكسار: وهو انا ذنبي انا ابويا سابني صغيرة ومعرفش مكانه
يجعر الحلوف المجنح قائلا: ماهو عشان كده طلعتي سايبة يا بنت المفكوكة
بإختصار وانا قاعدة في بيتي من غير ما اتحرك عرفت ان المسكينة ابوها سابها وهي
طفلة وطفش بقي مات الله اعلم وهي متعرفش عنه اي حاجة وحاولت ودورت
ومافيش فايده وكانت فاكرة لما تتجوز الراجل هيبقي حمي وضهر ليها طلع هو اللي
بيسيحلها وخلاني انا وغيري نعرف اسرارها وخصوصياتها
الي يغيظك بقي يا مؤمن انهم بعد ربع ساعة سباح وخنق اتصالحو
طيب سؤال: لزومه ايه ننشر غسيلنا الوسخ طالما هنرجع نتصالح
ليه الراجل لمحترم يشرشرح لمراته بالشكل ده
طب لما هي مش عاجباك اتجوزتها ليه
كاتجوزتها جدعنة يبقي تكمل جدع للآخر وخليك محترم في خلافك معاها
جاتكم الهم مليتو البلد



Public ▼

Post

 Status

 Photo

 Ask Question

 Milestone

يجيب الست الوالدة ويجي كدهون صاحب ام فارس الأحلام في ايده وجاي علي
البيت ده كده بالسمع يعني زي ال رايح عند البقال ده عشان عرف ان عنده جينة
كويسة اهو المحروس ده بيبقي جاي ع البيت ده سماعي يعني سمع ان في بنت هنا
وجاي يتفرج حبيب ماما

يجي ويقعد في الصالون ويشرب الجاتوه وياكل الشاي ويتفرج ع البنت المسكينة
ويوشوش امه وامه توشوشه وياخدو بعضهم ويمشو ويقولو هنبقي نتصل ويخلعو
اه والنعمة عادي كده بيخلعو بدون اي مراعاة لشعور المسكينة دي ال خدت اجازة
وقعدت تستني الأمور ولا مراعاة بقي للأسئلة ال هتاقلها من نوعية ها عملتي ايه
مع العريس ال جه امبارح اوعي يكون خلع زي ال قبله يعني يا حضرة المحروس
اكيد في طريقة ادمية تشوف البنت قبل ما تدخل بيت اهلها وتجرحها كده جتك
الهم والله لو اشوفك كنت اعلقك من حواجبك

 Public ▼

Post

 Status Photo Ask Question Milestone

١٦ ديسمبر ٢٠١٤

شوفي يا عزيزتي الأنثي

محدث هيجبك حقك في ام البلد دي غير دراعك

هتتعاكسي في الشارع هيتقالك غيري لبسك

تتعاكسي في الفون هيتقالك غيري رقمك

تتعاكسي في الشغل هيتقالك غيري اسلوبك

يعني باختصار انتي الي مطلوب منك تغيري كل حاجة في حياتك عشان كائن

الحلوف المجنح كرشه بيمنعه من التغيير

فتغيير بتغيير بقي غيري معالم وشه اخرمي عين اكسري مناخير اضربه بين

عنيه اهو الي ايدك تطوله

واهو تبقي غيرتي صحيح

 Public ▼

Post



Status



Photo



Ask Question



Milestone

١٥ ديسمبر ٢٠١٤

التعليم في كل حنة في العالم خطوة للأمام بس التجربة العملة اثبتت عندنا انه عشر
خطوات للخلف



هديلكم مثال بسيط عشته وشفته

عن ملك بنت من العيلة

لما اتولدت ملك كانت توأم ولأن امها كانت صغيرة ومحتاسة وانا كنت فاضية
فتوليت العناية بملك اول ٥ سنين من عمرها

البنت ماشاء الله كانت ذكية جدا وعشان احنا كنا في بيئة شعبية والأم والأب مش في
دماغهم جو كي تو والكلام ده قررت اعلمها الأساسيات في البيت عشان لما تروح
المدرسة تبقي شاطرة

وحصل بقت ملك صاحبتني بقي ونلون سوا ونتكلم إنجلش سوا ونغني إنجلش كمان
ده غير انها حفظت جزء عم وتبارك وبقت تعرف تحل مسائل حساب بسيطة



Public ▼

Post



Status



Photo



Ask Question



Milestone

وعندها قدرة تقري قصة اطفال من الي بتبقي حوالي خمسين كلمة معه الصور
والتلوين ده غير انها ممكن تعمل محادثة بسيطة إنجلش يعني لو احنا برة ممكن
تقولي عاوزة تاكل إيه او عاوزة تنام او عاوزة تواليت كل ده إنجلش
انا كنت فرحانة بيها قوي وكنت حاسة انها لما تدخل مدرسة هيذيد نشاطها وتتعلم
اكثر بقي وتبقي نابغة
ملك راحت المدرسة وكان لازم اسيبها ترجع بيت اهلها عشان تبقي مع اختها في كل
حاجة
وانا اتشغلت شوية في شغلي وجوازي يعني غبت عنها حوالي سنة
ومن شهر جت تقعد عندي يومين هنا
لقيتها بقت واحدة تانية خالص
اولا نسيت كل الي اتعلمته معايا قبل المدرسة واتحولت لكائن لطح كده مش بتفكر
في اي حاجة غير انها تاكل وتنام
ولما سألتها بتاخذو إيه في المدرسة قالتلي ان اليوم بتاعها بيبقي كده



Public



Post



Status



Photo



Ask Question



Milestone

ابلة ميرفت بتيجي تديهم انزليجي يفتحو الكتاب وينامو عالدسك وبعدين في الدرس
هي هتبقى تحللهم الواجب والأستاذ إيهاب بتاع العربي بيقولهم الي معاه اكل
يطلعه وياكله منغير صوت وينزلو الحوش في الفسخة يلمو الورق وياكلو كشري من
عند ام اشف وخلاص

بقولها طب أكثر حاجة بتحبيها في المدرسة إيه قالتلي بحب لما الأبله تدينا واجب
صغير وتحلهولنا في الدرس

ملك مبقتش عارفة ٤+٤ كام بس الميس والمستر بيدوها عشرة من عشرة عشان هي
عندهم في الدرس وهي شايفة إن كده كويس وكلهم بيقلو عليها شاطرة
انا في سري

ياريتك مادخلتي مدرسة ولا شفتيها ياخسارة



Public



Post

Status

Photo

Ask Question

Milestone

١٥ ديسمبر ٢٠١٤



هواية جديدة اكتسبتها من احتكاكي بالوسط الأدبي
 مبدئيا مش اي رواية بتشوفها في البيست سيلر تكون فعلا
 بيست سيلر عشان في ناس بتدفع للعاملين في المكتبة عشان
 يحطو رواياتهم في البيست سيلر وكمال في مكتبات بتكون
 تابعة لدار نشر معينة بتحط روايات الدار بتاعتها بيست
 سيلر عمال علي بطل، انا بقي بقيت اقعد اركز في كل
 بيست سيلر عشان اقدر اميز هل دي مجطوبة بنزاهة ولا
 حركة

اولا البيست سيلر المعمولة بنزاهة هتلاقي فيها تنوع كبير رعب علي روايات طويلة
 ومجموعات قصصية وساخر وهتلاقي نفس الروايات دي او معظمها محطوبة
 بيست سيلر في اكر من مكان، انما لما تروح مكتبة مثلا وتلاقي خمسة ست من
 اصدارات الدار امالكة للمكتبة في البيست سيلر وجنبهم كتب محدش سمع عنها غير
 في طبق اليوم افهم انها مطبوخة

ومن بيست لبيست متقولش لبست 😊

Public ▼

Post

 Status Photo Ask Question Milestone

١٣ ديسمبر ٢٠١٥



ام واب عايزين ضرب الشبشب

امبارح كنت في مول الداون تاون اسكندرية

وعشان امبارح جمعة فالدنيا زحمة بقي وهيصة

وقبل مانروح بشوية دخلنا كارفور عشان نشترى شوية حاجات قبل ما نروح وعند

قسم الملابس

كان في اسرة عبارة عن اب وام وطفل كبير شوية (٤) سنين مقعدينه في الترولي بتاع

الماركت وطفل ثاني لا يمكن يزيد عن سنتين ممشينه جنبهم علي الأرض جميل اسرة

جميلة

اللي مش جميل بقي ان الأم الأمورة اتشغلت في عرض كده علي البدييات وقعدت

تجرب وتختار الألوان ومعجبة بنفسها قوي والأب الأهل مركز معاها واول ما خلصو

فرجة خدو بعض وراحو يشوفو حاجة تانية ونسيو الولد الصغير اللي سنه سنتين

 Public ▼

Post



Status



Photo



Ask Question



Milestone

انا كنت ببص للولد من بدري عشان شكله قمر وضحكته حلوة ولقيتهم سابوه
ومشيو وفي ثانية تاهو في الزحمة وبقي الولد ده وحده عمالة اتلفت يمين وشمال
مافيش فايده والولد ياعيني لما لقي نفسه لوحده بقي علي وشه نظرة رعب تشيب
واتلمت كام واحدة يحاولو يساعدو وقلبنا مخلوع علي الولد الي بدأ يعيط وعاوزين
نوصله للأم وكنا فاكرينها قلقانة زينا

فين بعد ربع ساعة ظهر الأب ال لامؤاخذه %\$%\$%\$%\$ ومبتسم والأم ال
#\$%\$#@%\$ ومنشكة قوي وبتقول اهو والأب يبصلنا ويقول اصل هو السبب
غاوي يقف ويسرح

احيييييييه يعني هو الي عنده سنتين هو الي غاوي يسرح وانت والكلبة دي
شغلتم ايه وما انتو مافيكوش دماغ تركزو مع عيالكم كنت بلاش خلفه واشترو
لعب بلاستيك العبو بيها وخلص بلاش قرف

لا حقيقي الأمومة ملت

والأبوة رمرمت



Public ▼

Post



Status



Photo



Ask Question



Milestone

١٠ ديسمبر ٢٠١٤

البت الي بتوافق علي اي عريس يتقدم لها بحجة انه لقطة
زي بالضبط الي بيشتري زحافات جليد عشان عليها عرض خاص
لا اللقطة هيطلع لقطة ولا هتلاقي جليد تستعملي عليه الزحافات



www.Vecto.rs · 24992



Public



Post



Status



Photo



Ask Question



Milestone

٩ ديسمبر ٢٠١٤

هو ليه الأفلام العربي من يوم ما اخترعو السينما بتدور حوالين اربع مواضيع مافيش غيرهم

-البطل ال بيعب البطة وفي واحد رخم عاوز يخطفها منه وابوها بيشجع الرخم علي رخمته

-الواد الحرامي ال الدنيا كلها بتحبه وبيطلع براءة في اخر الفيلم

-العيال الطيبين ال بيتخانقو مع الحرامية الوحشين وينتصرو مع كلمة النهاية

-والست نادية الجندي الوطنية الوحيدة ال بتحب مصر ويعذبوها عشان خاطر

مصر ويوسوها بالعافية عشان خاطر مصر

ياعيني عليكي يا مصر محدش بيحبك غير نادية الجندي

اسفين يا مصر مالتيش غير نادية



Public ▼

Post



Status



Photo



Ask Question



Milestone

اقريلي ده واكتبيلي ده وروحي احلقي بدالي وتعالى اهرشيلي في قفايا
لحد ما يشطب علي الطاقة الي عندك وهوووووووب تبقي قديمة ومملة وهوووب
يتعملك بلوك وهوووب يصطاد حد تاني وتعيشي وتاخدي غيرها
وهو ماشي في السكة بقي ممكن يخسرك صحابك يخسرك منظرک قدام الناس
عادتشي بقي بس الصراحة هتكوني قضيتي وقت لتشيف لتشيف يعني
قال مثقف وحساس قال جتكم نيلة مليتو البلد



Public ▼

Post

Status

Photo

Ask Question

Milestone

٨ ديسمبر ٢٠١٤

قالولي فيه قرية ذكية!!!!!!

هناك مصالحك مقضية

ولاحاجة ابدأ راح تحصل وتعطلك النوبة ديا

روحت ولقيت نفس النيلة

وورقي مع ابلة عديلة

اقولها امضي تقوم رامية


ملفي للأستاذة سامية

وسامية بتقمع بامية

وتدعي عالمحروس جوزها

ياسيدي علي لوية بوزها

بعتنني للأستاذة باتعة



Public ▼

Post

 Status Photo Ask Question Milestone

بتحل كلمات متقاطعة

وبتشكي مالمية القاطعة

اقول يا عالم مشوني

يقولولي الصبر شوية

روحي لنبيل اخر الطريقة

ودمي محروق كذا حرقة

اروح يقوللي ارجعي تاني

لسامي في الدور تحتاني

تعبت منكم اه ياني

ولا حاجة ابدا مقضية

مافيش ذكاء ابدا فيها

غير الغباء ال ماليها

وصرفتو اموالنا عليها



 Public ▼

Post



Status



Photo



Ask Question



Milestone

تکيف وزرع علي قيشاني

وظفتو فيها ناس رخمة

وغبائها دا ال عامل زحمة

هموت يا علم الرحمة

امال لو ماكانتش ذكية



Public ▼

Post

 Status

 Photo

 Ask Question

 Milestone

٦ ديسمبر ٢٠١٤

الشقة بتاعتنا رغم انها حلوة وعاجباني بس طلع فيها عيب خطير

بلكونتها مكشوفة للبلكونة الي جنبها يعني ببساطة كأننا قاعدين مع الجيران في
الفسحة

مكناش نعرف ده في الأول عشان الشقة الي قصادنا كانت فاضية بس للأسف
سكنت

والسكان الجداد اسخف انواع البشر

جارنا الجديد بيفكرني بخال محمد هنيدي في فيلم عندليب الدقي وغاوي شيشة
وقاعد في الكورنر الي لازق في شقتنا ليل نهار يعني ببساطة لو طلعت البلكونة
هتأذي بكتاف وفخاد البيه ولو قعدت في الصالون هتعمي من ريحة الشيشة
وبيطبق نظرية محمود سعد في التدين الوسطي الجميل هو لابس الفانلة واللباس

والمودام بقميص البيت ابو حمالات ليل نهار

يعني اتحرمنا من البلكونة الي بتبص عالبحر للأبد


 Public ▼

Post



Status



Photo



Ask Question



Milestone

يعني لابسين كده في البرده امال في الصيف هتطلعولنا ايه ملط مثلا
ثم انا ذنبي ايه اصطبخ بفخاد وكتاف البيه والهانم كل ما احب ادخل بلكونتي
فخاد إيفري وير

حد يوريني الي صمم ام البلكونة دي عشان اولع فيه
مافيش ذرة خصوصية عند الحلوف المجنح حسبي الله ونعم الوكيل



Public ▼

Post



Status



Photo



Ask Question



Milestone

٤ ديسمبر ٢٠١٤

الكهربا بتقطع في الشتا ليه يانور عنينا
معلش ياشعب بفرقها عالي حوالينا
كهربتنا بتكهرب ليبيا واحنا قاعدين
وغازنا بيروح إسرائيل واحنا قاعدين
فلوسنا متنطورة في سويسرا واحنا قاعدين

ولما اتنحنلنا

قمنا اتخضينا بقي



Public



Post

 Status

 Photo

 Ask Question

 Milestone

٤ ديسمبر ٢٠١٤

اول ما سكنت في العجمي تحديدا في النخيل

سكنت في الشتا المكان بصراحة كان قطعة من اوربا وخصوصا مع وجود السوريين

وخدماتهم وادبهم

فمن كتر ما كنت مبسوطة بالمكان كنت بقعد اقول لأصحابي في القاهرة يجو يقضو

هنا يومين

لحد ما واحد سئ الحظ سمع كلامي وجاب اخوه واتنين صاحبه وقالو يقضو يومين

عالبحر في الهدوء

هما وصلو وأجرو شاليه

ودخلو ينامو ساعتين صحيو ملقوش العربية

صاحب العربية محامي اصلا فطبيعي انه يمشي

قانوني

راح القسم وعمل بلاغ بمواصفات العربية


 Public ▼

Post



Status



Photo



Ask Question



Milestone

الظابط قاله طيب يا استاذ علي سيب رقم موبايلك واحنا هنكلمك لو وصلنا لحاجة
علي رجع الشاليه وهو منتظر اخبار عن عربيته اللي جايها بخلع الضرس وعليها
اقساط السنين

المهم مافيش ربع ساعة من رجوعه القسم

موبايله رن

_الوه

_الوه استاذ علي

_ايوة انا مين حضرتك

_معاك ابو رحيمة

_ايوة يعني مين حضرتك

_شوف يا استاذ علي عربيتك عندي وبما انها موديل السنة دي هنكرمك فيها وناخد

٢٥ الف بس

_لا انا رجل قانون وعملت محضر في القسم وعربيتي هتيجي من غير ولا مليم



Public ▼

Post

[illegible]

هيجبها لك

رجال الشرطة

_طب بص بقي يا حلو المبلغ عشان قانونك وفزلكتك زاد بقي ٣٥ الف ورجال
 القانون دول هما الي ادوني رقمك وقالولي اتفاهم معاك وهياخدو حسنتهم بعد
 الشغلانة ما تخلص

لا يمكن انا هصعد الموضوع

_طب والنبي وانت بتصعده مسيلي علي حازم باشا العمري وقوله اني خلصت في
 الأسكودا الفضى بتاعة الموزة اللي بلغت امبارح وبوسلي القانون من بؤقه

Post

 Status Photo Ask Question Milestone


٢٩ نوفمبر ٢٠١٤

ماهو الشعب اللي بقاله اربعين سنة بيتفرج علي دعاء الكروان ولسة بيتفاجئ

ويعيط علي موت هنادي

طبيعي انه يتفاجئي براءة مبارك

ناس طيبين قوي يا خال

 Public ▼


Post

 Status Photo Ask Question Milestone

٢٩ نوفمبر ٢٠١٤

في اديب رائع المعاني والألفاظ

وفي اديب راقع فول في الإنجاز

 Public ▼

Post

 Status Photo Ask Question Milestone

٢٨ نوفمبر ٢٠١٤

افتح قناة الجزيرة الاقي البلد بتولع

افتح القنوات المصرية الاقي الدنيا اخر روقان

هو ما حدش بيقول الحقيقة في البلد دي غير قناة التت

بس كاميليا الرقاصة حلوة مافيش كلام

 Public ▼

Post



Status



Photo



Ask Question



Milestone

٢٦ نوفمبر ٢٠١٤

عزيزتي الفتية

فكك ياختي من جو كاظم واخاف ان تمطر الدنيا ولست معي والجو ده اسمعي
مني مافيش حد هينفعك في البرد ده غير مج سحلب محترم سبقه طبق محشي معتبر
خليكي كده بكرامتك لكلوكك في رجلك زعبوطك في راسك كتابك في ايد ومج السحلب
في الايد الثانية والي يقولك نخرج في المطر ده يا ماما بيبقي عايز يجبلك التهاب
رئوي عشان يفرکش معاكي ويعلق زوزو انجيه

فهمتي ياسمك ايه



Public



Post



Status



Photo



Ask Question



Milestone

٢٤ نوفمبر ٢٠١٤

كنت قولتلکم من ساعتين اني نازلة وطلبت منکم تدعولي يا اندال بس واضح انکم
کسلتو تتوضو وانتو بتدعو

فلقد قابلت سواق امور مشغل مهرجان الکمة وقاعد جنبه واحد رمة عمال يشتم في
الثورة والشعب والعيش والعيشة وخصوصا الحريم الراجل قعد من الهانوفيل لحد
البیطاش يدعي علي الحريم لدرجة اني بمد ايدي للسواق بالفلوس فرد هو عليا وقال
ابقو خلو معاکو فکة وانتو بترکبو ربنا ياخذکو فکان ردي :هو حضرتک عشان المدام
مدياک شبشبين هتطلعهم علينا ولا ايه وعموما واضح ان الشبشبين مکانوش کفاية
وهتاخذ عليهم کمان نص دسنة

ولما وصلت معمل التحاليل لقيت الدكتوراة الأمورة ماسكة سنکوتش الطعمية في ايد
ومج الکافي ميت في ايد وقالتلي وبؤقها محشور اکل تعالي بعد نص ساعة

وبعد ما خلصت تحاليل لقيت الدنيا مطر والجو جميل قولت اروح سوق الهانوفيل
وهناک بقي يا مؤمن الست الي بتنقي سمک لازم ولا بد تمسح ايديها في هدومي
قال يعني بتططب عليا



Public ▼

Post



Status



Photo



Ask Question



Milestone

والراجل بتاع الخضار اقوله عايزة بطاطا يقولي وماله القلقاس كفر يعني

لدرجة اني حسيت اني وقعت في فيلم كارتون وقعدت ادور علي المخرج عشان يحط
مشهد النهاية لأني استويت تقوم تختم بمستر بريذدنت ابو سيد البواب وهو بيقولي
يا مودام نوووووووووووووووووورما ينفعش تدخل دلوقت عشان هتوخلي
المدخل

يلا اهو حلال عليه اللي خده

بعد كده ابقو ادعو بذمة يا رخمين



Public ▼

Post



Status



Photo



Ask Question



Milestone

٢٣ نوفمبر ٢٠١٤

اسرع طريقة عشان تبقي مشهور ومثير للجدل وحاجة كده تشطيب سوپر لو كس

لو انت ولد : اتكلم عن الإلحاد وسيح لنفسك انك ملحد وكدشة

لو انتي بنت : اتكلمي عن النص التحتاني بكل بجاجة وقولي دي حرية وكدشة

يلا الف مبروك بقيت نجم الموسم



Public



Post

 Status

 Photo

 Ask Question

 Milestone

٢٠ نوفمبر ٢٠١٤

بنجلاديش والي منها

يعني الصينين غزو كل زوخيقة في البلد وقولنا ماشي اهو بضاعتهم رخيصة وناس في
حالهم بياكلو عيش

اخواننا السوريين علي راسنا الله يردهم بلادهم سالمين بس ناس مهذبين وخدمين
ويتحبو من زوقهم واهو الي ليه رزق مكتوبله في البلد دي حلال عليه

لكن في هنا داهية من دواهي الزمن اسمها العامل البنجلاديشي

انا معرفش دول دخلو البلد تحت انه ي مسمي وإيه القانون الي بيتطبق عليهم

العامل البنجلاديشي

بيرضي ياخذ مرتب ٧٥ دولار في الشهر يعني حوالي ٦٠٠ جنيه في الشهر وبيقبل

يشتغل اي حاجة وتحت اي ظروف حتي لو طلبت منه ينتحر

بيعيشو تجمعات ٢٠ أو ١٥ شاب في شقة واحدة

عشان يقسمو الأيجار وبينامو علي البلاط عادي


 Public

Post



كل ده ميفرقش

اي نعم بياخدو مكان العامل المصري عشان في شركات بنت تيت بتستغل انهم مش خاضعين لقانون العمل وبتلطش فيهم براحتها

بس كمان العامل البنجلاديشي فوق إن هو معفن ورمة لا ده كمان متحرش بطبعه

تخيل كده تبقي راكب ميكروباص وفي الكرسي الي قدامك اتين منهم وقاعدة جنبهم بنت ودول هات يا حك وتحرش وقلة ادب

هتقولي ده موقف واحد هقولك لأ هما هنا في العجمي كتير ووساختهم باينة لدرجة انهم اتهجمو علي واحدة ست ساكنة في نفس العمارة الي هما فيها استغلو وجودها وحدها واغتصبوها وبعدين عزلو من الشقة والست حقها ضاع طبعا

العامل البنجلاديشي كان السبب ان عمال السويس للحديد والصلب المصريين مرتباتهم تقل ويتقالهم الي مش عاجبه يغور ونجيب بنجلاديشي بداله

العامل البنجلاديشي واخذ مكان المصري في المواني التجارية بأقل اجر ممكن

ياتشوفو قانون يظبطهم يا تغورهم من هنا ولا القوانين اتعملت لسحل الطلبة بس



Status

Photo

Ask Question

Milestone

١٩ نوفمبر ٢٠١٤

عاش الباشا حامي الأمن ومطهر البلد

كنت قولتلكم من كام يوم ان في حد حط رقمي علي صفحة زباله بقيت اقفل فوني
شوية واشتم شوية لحد ما واحد صديقي جابلي اللينك بتاع الصفحة فخليت اصحابي
دخلو رفعو بوستات دينية وريبوتات ومعرفش لحد هنا وتمام

من يومين لقيت التليفونات زادت تاني وبصراحة انا مخي جزمة ومش هغير رقمي

عشان واحد ابن جزمة بيلعب بالرقم

المهم قولت ابص في الصفحة الزباله دي

اشوف هو رفع الرقم تاني ولا ايه اللي

حصل خلي التليفونات زادت تاني ليه

ولقيت ايه بقي نفس الأكونت ده اللي

ناشر رقمي ناشر ارقام اكتر من خمسين

بنت وكاتب جنبهم معلومات عنهم زي

الأسم وكونها طالبة او متجوزه



Public ▼

Post



لحد هنا وقولت الي زي ده لازم يتري

وعشان انا بحترم اسم الله عليه القانون

قولت امشي رسمي الصبح رفعت بوست اسأل علي مكان ابلغ شرطة الأنترنت

واتبرع اصحابي وقالولي اوصل ازاى وادوني ارقام التليفونات

واتصلت بقسم الي في القاهرة الي سألني علي محل إقامتي وعرف إنني في اسكندرية

فإدالي رقم مكتب شرطة الأنترنت في اسكندرية فاتصلت وكانت المكاملة كالتالي

-الو من فضلك عايزة اعل بلاغ عن اكونت فيس

-خير يا مدام عمل إيه

-نشر رقمي وارقام تانية وكاتب جنبه الفاظ تعتبر سب وقذف

-الأكونت ده بيتكلم في السياسة

-لا

-شتم الحكومة او النظام هاتي البوست وتاريخه واللينك

-لالالا مشتمش في النظام





Status



Photo



Ask Question



Milestone

-طب شتم سيادة الرئيس

-ياسيدي بقولك لأ ده ضايقني انا

-اتفضلي يا مدام غيري رقمك احنا مش فاضيين للتفاهات دي

-حضرتك مقدرش اغير رقمي

-يبقي متشتكيش

ودش قفل السكة في وشي

لا حقيقي القانون واخذ مجراه

وانا كنور بدأت احترامه خالص

انا معنديش تعليق انتو عندكو ؟؟؟؟؟؟؟



Public ▼

Post

 Status Photo Ask Question Milestone

١٨ نوفمبر ٢٠١٤

شوف انا اقبل اي حاجة

اقبل معونة

اقبل عزومة

اقبل هدومك القديمة

لكن اقبل اد وانت مسمي نفسك (فارس احلام الموزز)

ده لا يونكن ابداء علي جثتي

جتكم الهم

 Public ▼

Post



Status



Photo



Ask Question



Milestone

١٥ نوفمبر ٢٠١٤

يعني احنا خلصنا كل انواع الهبل في الدنيا وبدأنا في مرحلة المخدرات الرقمية

المرحلة اللي جاية إيه بقي الإنتحار بلوتوثا

ولا القتل اندرويدا



Public ▼

Post



Status



Photo



Ask Question



Milestone

١٥ نوفمبر ٢٠١٤

هي البلد دي ممكن تكون قاسية ومقرفة اكثر من كده إيه

واحدة اعرفها شابة صغيرة وام لطفلة ٥ شهور وطفل ٤ سنين عملت حادثة بالعربية
من يوم الأربعاء

جريو بيها علي المستشفى وطبعا ساعات من الإهمال والقرف لحد ما اليوم خلص
والست واضح انها اتصابت في رجلها اصابة جامدة

ومحتاجة اشعة رنين مغنطيسي بسرعة عشان نعرف الإجراء المناسب

يوم الأربعاء ملحقوش يعملوها عشان ضعيو الوقت في إجراءات عقيمة وتحقيق اهلل في
الحادثة

ويوم الخميس لحد الظهر مكانتش وحدة الأشعة في المستشفى فتحت اليوم بيضيع

وهما لسة مش عارفين يعملو حاجة طيب نجيب اسعاف وندور علي مكان ثاني

الوقت بيمر بسرعة في الظروف دي علي ماجت الإسعاف وتصاريح خروج ونيلة بقينا

بالليل جري علي كل مكان ممكن يكون في اشعة الناس قفلت وامبارح كان الجمعة



Public



Post

الله جمعة يعني ايه يا جماعة هي الطوارئ والحوادث بتستني مش لازم يبقى في
مكان واحد علي الأقل شغال

لا انتو في مصر محدش بيشتغل الجمعة ويقولو لجوزها معلش يا استاذ الدنيا مش هتطير
ماهي مش هتطير يا ولاد الباردة بس رجل الست هي الي ممكن تطير

خليك مؤمن يا استاذ ده قضاء الله

النهاردة السبت اليوم الرابع والست لسة متعملهاش اي اجراء طبي عشان احنا
شعب جميل وبلد اجمل بنقفل الطوارئ يوم الجمعة ونقيل السبت ونريح الأربعاء
ذنبا في رقبة مين

لما تيجي تعمل حادثة خليك زوق واختار الوقت
المناسب

ولا خليك مليونير وسافر برة

متتعيش الدكاترة معاك





Status



Photo



Ask Question



Milestone

١٣ نوفمبر ٢٠١٤

الناس_بنفضفض_معاهم

معاهم ٣ انواع


نوع مطيياتي ال هو يسمعك ويقعد يقول معلش معلش

ونوع مفتي ده ال بقعد يقولك انت غلطان كان لازم تعمل كده وكده وهو مش

فاهم حاجة اصلا

ونوع بقي بيشتغل في النشرة اول انت ماتخلص فضفضة يذيع

يبقي خليك عاقل و احتفظ_باسرارك لنفسك



Public ▼

Post

Status

Photo

Ask Question

Milestone

٩ نوفمبر ٢٠١٤

جدتي في مصلحة حكومية

الله يرحمها كان ليها معاش بسيط في التأمينات وكانت معتزة بيه جدا رغم انه مبلغ
تافه بس كانت كل شهر تروح بكل همة ونشاط تقبضه وتبقي سعيدة قوي بيه
عشان حاسة انها ليها حقوق وينفع تشتري لنفسها حاجة ولو بسيطة من غير ما
تحتاجلي او لحد من ولادها

المهم انها كل شهر تروح تقبض المعاش لحد ما جه شهر منيل راحت تقبض الموظفة
قالتها مالكيش معاش يا حاجة عشان التأمينات قطعته

-ليه يا بنتي

-اصلهم بعد سن ال ٨٠ بيفتكروكي موتي

-بس انا عايشة اهو

-معلش يا حاجة روعي مكتب التأمينات

واعملي زي ما هيقلولك عشان المعاش يرجع



Public ▼

Post

-اديني العنوان يا بنتي

-خدي يا حاجة ادي العنوان اهه وجواب

رجعت جدتي البيت وهي مهمومة زي اللي سقط في ثانوية عامة كلمة فاكرينك

موتي دي وجعتها ووجعها اكر ان المعاش بتاعها اتقطع

يوم وتاني يوم قالتلي انها عايزة تروح مكتب التأمينات وقتها كان عندي شغل وكان

صعب اخذ اجازة وبصراحة كنت مستهيفة الموضوع

المهم وصلتها في طريقني للتأمينات واتطمنت انها هترجع مع حد من صحاي ومشيت

علي الشغل

بس طبعا المهمة متقضتش في مشوار

ويوم بعد يوم تاخذ عكازها وتضرب المشوار ده وهي ماسكة دوسيه عمال يكبر

وبدات تطلب مني حاجات غريب انها تطلبها بس وماله عنيا ياستي

_عاوزه برطمان نسكافيه

_ليه ياستي



Status



Photo



Ask Question



Milestone

_عاوزاه و خلاص

_حاضر

-عاوزه كركديه اسواني و حنة

_حاضر ياستي

وهكذا طلبات غريبة بس مقدرش اقولها لأ

لحد مافي يوم اخدت اجازة من الشغل اسبوع بحاله اول يوم صحتني وقالتلي نازلة
رايحة التأمينات وراجعة مركزتش معاها نزلت ورجعت مجهدة وضغطها عالي ومش
قادرة تاخذ نفسها

_انتي كنتي فين ياستي

_كنت بشوف ورق المعاش

_هو لسة مخلصش

ردت بصوت زي الطفل المغلوب علي امره _لا لسة وانا مش عارفة اعمل ايه

قررت ارواح معاها تاني يوم لما لقيتها مصممة عشان بس افهم في ايه



Public ▼

Post



Status



Photo



Ask Question



Milestone

رحنا الصبح وهي دخلت قدامي وانا وراها علي مكتب موظفة كده تخينة الجسم
والعقل اول ماشافتها مخدتش بالها ان في حد معاها فقالتلها

_هاه ياست ناجية جبتيلي معاكي الي قولتلك عليه

_ايوة يابنتي جايالك بيض بلدي اهو وزبدة

_شاطرة حطيه هنا وروحي بقي جبيلي فطار عشان اعرف اشوف ورقك

_هو لسة برضه يابنتي مش عاوزين تخلصولي ورقني

_متتكلميش كتير بقي وهاتيلنا الفطار محدش مصدق انك عايشة ومحدش راضي

بمضيالك

_متمضيالي انتي يابنتي

_امضيالك عشان تخلصي وتمشي امال مين الي هيجبلي فطار

فهمتو يعني الموظفة الحلوفة دي كانت بتستغلها في سنها ده وتطلب منها الطلبات

دي كلها سفلة او رشوة وكمان بتبعثها تجيبها طلبات في السن ده



Public ▼

Post



Status



Photo



Ask Question



Milestone

لحد هنا مقدرتش امسك نفسي وجبتها من شعرها ومسبتهاش غير لما ورق جدتي كله
كان خلصان في اقل من عشر دقائق رغم انهم معذبينها لأكثر من شهر رايحة جاية
ست معدية ال ٨٠ ومريضة وكان ممكن يحصلها حاجة ومنعرفش طريقها
ياتري في كام واحدة زي جدتي في المصالح الحكومية والحلايف دول بيستغلوها



Public



Post

Status

Photo

Ask Question

Milestone

٦ نوفمبر ٢٠١٤

بس بس بس بس

تعالى نلعب لعبة صغنة

تخيل كده اوتوبيس مدرسة انترناشيونال واخذ الطلبة ولاد الناس ورايح بيهم المدرسة

وجه لوري عجن الأوتوبيس ده اللي فيه العيال ولاد الناس المهمين دول

ماهو اللي معاه فلوس يدفع لأبنة ٥٠٠٠ دولار في الشهر اكيد حد مهم

المهم بقي يا حلو لو الأوتوبيس ده ولع رد فعل اهااليهم هيكون ايه

هتقولي اتوبيساتهم مبيحصلهاش حاجة عشان سواقينها علي اعلي درجة من الكفاءة

والأوتوبيسات علي اعلي جودة

هقولك ياسيدي تخيل مش هنخسر حاجة

ها تخيلت تخيلت جامد

تصبح علي خير بقي



Public ▼

Post



Status



Photo



Ask Question



Milestone

٦ نوفمبر ٢٠١٤

لو كانو سألونا قبل ما يخلفونا عارفين كنا نقول إيه
كنا نقول اولدونا في بلد تحترم ابونا وموت بكرامة فيه
مبسوطة يا ماما حوا مبسوط يا بابا ادم



Public ▼

Post



Status



Photo



Ask Question



Milestone

٥ نوفمبر ٢٠١٤

قل للمليحة بالخمار الأسود

خبي تضاريسك المتبعترة يادلعددي



Public ▼

Post



Status



Photo



Ask Question



Milestone

٣ نوفمبر ٢٠١٤

في واحدة ست مصرية عاملة بورنامج اكل اسمه (دبر ووفر) وبتقول وصفات اكل
موفرة عشان منصرفش كتير

هي بتقول بدل ما نعمل مكرونة بشاميل باللحمة

احن نعملها بالمشروم والفلفل الملون ولازم صويا صوص وخل بلسميك يعني بدل ما
اجيب نص كيلو لحمة ب ٣٥ جونه اجيب مشروم ب ١٥ جنيه وفلفل ملون الكيلو
ب ٢٥ جونه وصويا صوص القزازه ب ١٨ جنيه وخل بلسميك القزازه ب ٣٥ جنيه
ودي قمة التوفير الواحد يدعي يقول ايه



Public ▼

Post

Status

Photo

Ask Question

Milestone


٢ نوفمبر ٢٠١٤

مغامراتي مع إيديال زانوسي

من أسبوعين كنت نازلة اشترى غسالة وقولت إيه بقي استسغم ذكائي وانا بختار
واخترت توب لود عشان بقي إيه توفر في المسحوق وكمان مبقاش مضطرة اوطي وانا
بحط فيها الغسيل

وحصل واشتريتها وجبنا عربية توصلها وعمال تطلعها لحد فوق مطولش عليكو
دفعنا شوية فلوس حلوين لحد ما وصلت بالسلامة مرورا بخدمة العملا الي شلوني
لحد ما جه الفني وركبها

لسة هقول هيبينيه الغسالة طلعت بايظة اه والله
تخلي يا مؤمنة الغسالة مش راضية تقبل غير
بورنامج واحد قولت ماشي زي بعضه اعاملها زي
بنتي واسيبها علي كيفها بس البورنامج الواحد ده
الأوبشن بتاعه انها تطلع الغسيل وسخ وبصابونه
وتقطع شوية حاجات مش عاجباها
اتصلت بالشركة قالولي منعرفكيش



www.Vecto.rs - 13605

Public ▼

Post

ياخوانا عيب كده ميصحش دنا زبونة وكده

بصي يا زبونة تبديل غسالة مبنبدلش لو عاوزة صيانة نبعثلك وتدفعي للفني رسوم
انتقال وخلافه

يا ناس حرام ابدأ ولا يمكن

المهم قولت بدل ما اروح جهاز حماية المستهلك واقلب نافوخي لبست الغسالة
كرتونتها ورجعتها السوبر ماركت عشان معداش عليها ١٤ يوم ماشي ماشي
وطبق الأصل العلقه الي فاتت عربية توصلها وناس تنزلها يعني حسبة ٢٠٠ جونه
يلا معلش

عاوزين غسالة ثانية

البيع قال لا زانوسي في التوب لود وحش خدو فرونت لود قصدي يعني تحميل
امامي هات ياخويا وماله اهم حاجة نخلص

اشترينا وعربية وعمال تطلعها ومسحوق اوتوماتيك

واتصل بخدمة العملاء واستني الفني ٤٨ ساعة محبوسة في البيت لما الغسالة نفسها زهقت

واخيرا جه الدكتور سفير زانوسي الفني

بعد ما ركبها ولهف ١٠٠ مصاريف إنتقال بيشرحلي التعليمات إكمن الغسالة يعني
ديجتال واسمارت وهو توسم فيا الغباء فييقولي إيه بقي

بصي تحطي الفيشة كده

انا مندهشة

وده مكان الغسيل

یا را ااجل تصدق کنت فاکراه بانو

وهنا تحطي المسحوق

احيه العلم اتقدم يا ولاد

ولما تخلص هتطفي لوحدها توماتيكي يعني



Status



Photo



Ask Question



Milestone

لحد ما جه عند الحتة بتاعة لما تخلص انشري بسرعة عشان هيكمكم وعينكم ما
تشوف إلا النور شرحته انا بقي طريقة عمل سبع غرز في خلقته

الغسلات وسنينها

مالها غسالة ستي ما حلوة والنبي



Public



Post

 Status Photo Ask Question Milestone

٢ نوفمبر ٢٠١٤

لما بقري اخبار ثورة بوركينا فاسو بحس ان التاريخ مش بس بيعيد نفسه لا ده كمان
بيستهبل

نفس التسلسل اللي يشل

حاكم عسكري عامل نفسه دني

يقعد ٥٠ سنة

الناس زهقت

عملو ثورة

قال خليهم يتسلو

اتنحي

هرب

فرحو

 Public ▼

Post



Status



Photo



Ask Question



Milestone

بينضفو الشوارع

فترة انتقالية

وقريبا انتخابات وانقلاب ومن الأول سمعني ياليل ياعين



Public ▼

Post

 Status Photo Ask Question Milestone

١ نوفمبر ٢٠١٤

موظف خدمة العملاء في مصر مهما كانت شركته متدرب علي حاجة واحدة بس

كيف تشل الزبون او تجبله جلطة في اسرع وقت ممكن

انا متهيألي التارجت بتاعهم انه يجيب جلطة ل ١٠٠ بني ادم في الشهر والي اقل من

كده بيتحرم من الحوافز وممكن يترقد

 Public ▼

Post



Status



Photo



Ask Question



Milestone


٢٦ أكتوبر ٢٠١٤

جدتي كانت دايما تقولي

اتعلمي العلم حلو العلم سلاح

انا اتعلمت يا حاجة بس السلاح هيموتني انا

محدث ياخذ سلاحه ويديني بداله مروحة



Public ▼

Post

۲۵ اکتوبر ۲۰۱۵

عالمی ادبی زی کل مرة تحصل حادثه الإجراءات مش بتزید عن

شريطة سودا علي شوية قنوات وسخة

حبة تصريحات مقرفة من إعلاميين العار ومسؤولين اندال

شوية صور سودة وكام كلمة حداد

حبة هري علي الفيس وفي الشارع وفي الحمام يتلخصو في الفاعل اخوان لا تمويل خارجي لا داخلي اعدموهم افشخوهم حاربو الإرهاب قفلو شارع فيصل واول

شہاب

الرئيس يقدم التعازي

جنازة عسكرية

شش شش

[illegible]



Status



Photo



Ask Question



Milestone

بس خلاص

لو في حاجة بتتعمل غير كده مكانتش نفس الحادثة تتكرر بنفس الإسلوب ونفس

ال فشل في مقاومتها كأنه فيلم رخيص متعاد الف مرة

سينا مستهدفة خلاص نهجر اهلها ونفضيها

صناديق الزبالة بتبقي مفخخة شيلو الصناديق

الجامعة فيها شغب اقفلو الجامعة

منتهي الفشل في ادارة الأزمات ومستنيين اننا نتغير او نمشي لقدام ابقو قابلوني

حسبنا الله ونعم الوكيل



Public



Post



Status



Photo



Ask Question



Milestone

٢٢ أكتوبر ٢٠١٤

الشيخ المهدي بشير

للقضاء علي مس الجن وفك المربوط وجلب الغائب وزيادة الربح في التجارة
والبورصة ويساعدكم في كسب مسابقات السيارات والخيول والإبل وكاس العالم في كرة
القدم

اعمال السحر البسيط والمركب وجواز العوانس والعثور علي الكنوز المخفية وعمل
احجبة حماية من الأعداء والرصاص والنار والغرق

ارقام الشيخ متوفرة والمقابلة بأسبقية الحجز

الي فوق ده مش بوست تهريج من بتوعي

ده إعلان عن خير روحاني علي قناة مصرية للأسف

ياتري الشيخ ده ممكن يقدر يحرر فلسطين

ولما هو يقدر يخليك غني قوي كده كان لامؤاخذة نفع نفسه ومشتغلش الشغلانة

الهزق دي



Public ▼

Post

 Status Photo Ask Question Milestone

٢١ أكتوبر ٢٠١٤

وهو الفيس إيه غير ناس باردة تضيفك في جروبات وناس ابرد تعمك تاج في صور هبلة

وناس ابرد وابرء تسألك لما إنت مش بتتكلم خاص بتفتح فيس ليه

عبوكو كلكو

 Public ▼

Post

 Status Photo Ask Question Milestone

١٩ أكتوبر ٢٠١٤

انا مقدرش اتجوز واحدة غلطت معاها

نفسى اعرف تصنيف قائل العبارة دي

يعني يابن الداخه انت بلسانك الي عايز قطعه بتقول غلطت يعني انت تغلط

واحنا نشرب لمون ابو شكلك

 Public ▼**Post**

 Status Photo Ask Question Milestone

١٢ أكتوبر ٢٠١٤



إمبارح باليل موبايلى رن

رقم غريب رديت

الو

الو إزيك يانور

الحمد لله مين معايا

انا احمد بتاع المعادي

افندم مش فاهمة

انا اتكلمت معاكي عالفيس من يومين

نعم!!!

انا احمد بتاع المعادي

حضرتك انا مش فاكراك وغالبا معرفكش ممكن اعرف جبت رقمي مينين

 Public ▼

Post

 Status Photo Ask Question Milestone

جبتة من الفيس

نعم!!!!

ايوة جبت رقمك من بياناتك علي الفيس

اسفة والله مبتكلمش مع حد معرفوش

تخيل وتخيلي نفسك كده واحد طلبك وبيقولك انا احمد بتاع المعادي وانا قاعدة جنب جوزي يعني في ظروف تانية في ناس ممكن بيتها يتخرب بمكاملة لطيفة زي دي مش معني إن بياناتنا متاحة علي الفيس إنك تنتهك خصوصية الناس وتطلب اي حد علي مزاجك في اي وقت التطفل ده حاجة مقرفة جدا ياريت يبقي في شوية اسمه إيه ده احترام علي شوية بتاع ده ادب ومعاهم قليل من الحياء

 Public ▼**Post**



Status



Photo



Ask Question



Milestone

٨ أكتوبر ٢٠١٤

نفسى حد بس يدلني ولا يفهمني

إيه هي مؤهلات الكائن الهلامي/شريف مدكور

عشان يتقال عنه إعلامي ومذيع وقدير ونجم ومعرفش إيه ويقدم برامج طبخ

وموضة وبرامج حريمي ورجالي واطفالي

لابجد حد يقولي عشان هموت وافهم



Public ▼

Post

 Status Photo Ask Question Milestone

٨ أكتوبر ٢٠١٤

قانون مبيح ميش المغفلين ولا يسري علي الفاسدين ولا ينصف المظلوم ولا يعاقب
الظالم قلته احسن

 Public ▼

Post



Status



Photo



Ask Question



Milestone

٣ أكتوبر ٢٠١٤



في كل يوم تنحر رقاب اكثر من الف بقرة في سلسلة مطاعم
ماكدونالدز وحدها ولم يتحرك احد لهذه المجزرة البقرية
التي يباع الجرامات القليلة منها بعشرات الجنيهات ولكن
مذابح الخراف التي يطعم منها فقراء المسلمين مرة كل عام
اصبحت الآن إرهاب انه ارهاب الخرفان الجدد
اشباه ناعوت وامثالها كل علاقتهم بالإنسانية التي يدعوونها
مثل علاقة القروود بالذهب كلاهما لا يملك ما يدعيه



Public



Post

 Status Photo Ask Question Milestone

١ أكتوبر ٢٠١٤

عقلية مصرية

جاري ابوحسن الي هو جاري وصاحب العمارة في نفس الوقت والي بسبب

تصرفاتهم الغبية قررت اعزل لأن الحياة كانت جحيم

النهاردة بس اكتشفت السر في كل المضايقات الي كانت بتحسلي والي حكيترككم

عليها قبل كده الي منها انه بيتصنت عليا وكمان اشتكي لتيام اني بغني ومنها انه

بطريقة ما قاطع المية عن شقتي ومش بشوفها غير الفجر ومنها اني لما بصحي الفجر

واغسل وانشر يرمو رمل واسمنت علي الغسيل بتاعي

ومنها انهم بيحطو لזباله والتراب علي باب شقتي

كل ده وانا كنت ساكتة علي اعتبار انهم ناس مخهم علي قدهم وكمان انا مش من

الستات الي اول ما جوزها يرجع تقعد تسخنه علي الجيران وجو لخناق البلدي ده

بالعربي كده بحب اريح دماغي

 Public ▼

Post



Status



Photo



Ask Question



Milestone

المهم النهاردة كنت فاتحة الباب بعمل حاجة ومرات ابنه نازلة هما كل حريمهم
منتقبات وانا الوحيدة اللي في العمارة بشعري انا بحترم كل واحد يلبس اللي يعجبه
المهم الست نازلة سلمت عليا ومعاها ابنها فلت دخل جوة شقتي انا بحب الأطفال
فشيلته وبوسته واديته بونبون من عندي الولد اخده و الست نتشته من ايده بغباء
ورجعتھولي فقولتها ليه كده يعني انا لو طلبت منك حاجة هتفضي قالتي اصل
بصراحة محبش ابني ياكل حاجة من بيوت النصاري

انا اندهشت بصراحة وسالتها : ليه بقي مالهم النصاري يا ست الكل

اتحرجت جدا واعتذرت ومشيت من قداي جري شويتين وحماتها ندهت عليا
وقالتلي اوعي تزعلي احنا بنحبكم قوي دنا حتي ليا واحدة صاحبتي اسمها تريزة
وابو حسن ميحبش إلا الرئيس جورج وانا من جوايا كاتمة غيظي لحد ما تخلص
قصيدة لهري اللي بيدلقها كل مسلم متعصب في ودان مسيحي كنوع من الترضية
اخرا خلصت رغي فأنا قولتها عن إذنك عشان كده العصر هيفوتني
الست ازبهلت شوية كده راحت سألاني اغبي سؤال في العالم : هو انتو عندكم ضر
وعصر زينا

عندنا ايه وعندكو ايه ياست انتي مين اصلا قالك اني مسيحية



Public ▼

Post

Post

Status

Photo

Ask Question

Milestone

١ أكتوبر ٢٠١٤

قدام ماكينة الـ ATM طابور طويل وقفت لحد ما جه دوري وقد تخلل الطابور
 قليل من فلهوة الشعب المصري معلش ممكن اعدي قدامك عشان راكن غلط
 معلش والنبي يا مدام ابني سخن ولازم اوديه المشفشي

اوعي كده ياعم انا كنت واقف من بدري بس رحت اشرب سوجارة



هتقولي مروحتيش ماكينة غيرها ليه
 هقولك عددهم في العجمي يتعد
 عالصوابع وكل واحدة قدامها طابور ولا
 طابور الفراخ الجديد بقي ان جنب
 الطابور ده طابور تاني بس ناس واقفين
 يتفرجوا ه والنعمة المهم بقي يامواطن
 وصلت لحد الماكينة وشان حواليا زحمة
 قوي خفت حد يقري البيانات الي
 بكتبها فطلبت انجلش

Public ▼

Post



Status



Photo



Ask Question



Milestone

الي جنبى : مش لازم فذلكة يا مدام

خليها عربي وخلاص

انا لاتعليق

ضربت الباسوورد

الي جنبى بعد ما راسه لزقت في الشاشة : علي فكرة ابقى غيريه ده سهل قوي

انا اندهاش ولا تعليق

ده تاريخ ده ولا رقم تليفونك لا اوعي يكون عيد جوازك شكلك لسة صغيرة

انا اندهاش ودخان طالع من نافوخي وبرضه لا تعليق

طلبت المبلغ الي عايضة اسحبه

الي جنبى : تـؤ تـؤ تـؤ انتي باين عليكي مبذرة وخاربة بيت جوزك مش كتير كده

انا : اللهم طولك ياروح

الماكينة : لا يمكن تنفيذ العملية حاول مرة اخري

الي جنبى : مش قولتلك كتير



Public ▼

Post



۲۹ ستمبر ۲۰۱۴

زمان زمان بقي زمان ايام ما كانت النكت بتضحك

[illegible]

طبعاً فهمتو يقصد ايه يقصد ان مافيش حمير ولا حاجة في الحادثة غير الحمير اللي
صدقت واشترت

الحكاية دي مبقتش تضحك عشان بقت تتكرر كل ثانية دلوقتي هنا علي الفيس
تلاقي خبر او لينك (شاهد واقعة غريبة فستان فلانة وقع عالمسرح ومكانتش لابسة
تحتة حاجة ، قطة تنجب كلب مقطط لا تخرج قبل ان تقول سبحان الله ؛وهكذا
ويجي الكائن الفيس بوكي الحيحان يصدق الهري ده ويضغط بصباعه الي عايز




۲۹ ستمبر ۲۰۱۴

کائن السلندر

[illegible]

من مصلحة المتصل انه يوضح شخصيته وإلا انا مش مسئولة عن نوعية الرد الي



هيسمعه بلاش هزار البوابين ده

 Status Photo Ask Question Milestone

٢٧ ستمبر ٢٠١٤

اي عم سيد في ال بيحصل

عم سيد مصري صميم

بقوله عاجبك ال بيحصل ده ياعم سيد

قالي اه ثورة الحشيش فشلت يانور

حشيش ايه ياعم انت

هههههه اه معزورة مانتي متعرفيش انها ثورة حشيش

لا ياراجل

اه وحياء دي النعمة

ازاي بقي

قبل الثورة بتاعة ٢٠١١

 Public ▼

Post



Status



Photo



Ask Question



Milestone

حبيب العادلي زنق قوي ع تجار الحشيش ال بيشربوه الجماعة المثقفين والعيال بتوع
النت

ياسلام ياعم ده الشعب كله خرج ساعتها

يابنتي ماتبقيش عبيطة افهمي هما دول ملقوش حشيش ملو اهااليهم واصحابهم
ونزلو الميدان ونزل معاهم شوية ناس مش فاهمين حاجة

هما كانو بيقولو حشيش حرية بانجو في الجمعية

مبارك راجل كبير في السن وسمعه ثقيل

سمعها عيش حرية عدالة اجتماعية خد علي خاطره من الشعب

اتنحي قامو جم الجماعة بتوع الجنة والنار ركبوها وقالو احنا ال خلعنا الأسد

دوكهما مسكتوش قامو دولهما سابلهم الحشيش عالبحري

فاتجننو والدماغ عليت راحو مرجعين النظام القديم في رص الحجارة ولف السجاير

يعني ثورة حشيش ركبها اخوان وخطفها جيش كده ميتزعلش عليها غيرش بس

الناس ال صدقو وسمعوها عيش حرية وماتو في الرجلين كان الواحد قال #بلانيلة



Public ▼

Post



Status



Photo



Ask Question



Milestone

تنبيه

جميع الصور المرفقة ببوستات الكاتبة الأستاذة نور مانجا تم الاستعانة بها من محرك بحث جوجل صور و لم تكن في نيتنا الإعتداء على أى من حقوق أصحاب هذه الصور و لكن جاء استخدامها في سياق مضمون البوستات من أجل دعم فكرة البوست و نعتذر لكل من استخدمنا صور تخصه في كتابنا و نحترم حقه في ملكية الصورة و لذلك ننوه عليها في نهاية الكتاب



Public



Post



facebook



Status



Photo



Ask Question



Milestone

ففي جمهورية بلا نيلة
الدنيا عالخلق بخيلة
نعرق وتتعب في الزرعة
والمرتاحين ياخذو الشيلة



Public ▼

Post